

JON

Jon Riita Keyir Maji Kepi

GOD RIITI MAJI SII EETA MAK SIIR

¹ Mashi mashi nedii Maji rii eechaba tar. Eeta Maji rii God riitaka eecha tar. Eeta Maji rii eeta God. ² Mashi heyi nedii rii God riitaka eecha tar. ³ God riita riitak eyey boboyen otiitar. Boboy pochi akar nobok ya sokwakasakech. Yahoo. Eyey sokwari riita eyey otiichirek, sokwar. ⁴ Mayi riitaka eecha tarik eeta mayi sii eeta eyey ma yechi haba. ⁵ Eeta haba sii niyik yiyik okor tawak, niyi ya eeji pakasakech.

⁶ Ma porin riiti hi, Jon, God riita heechirek yar. ⁷ Rii haba majin sawoken eena yar. Rii yarek, diita haba majin sawonak, ma mima yenya hiki siitiichiken, eena yar. ⁸ Riita eeta habakasakech. Yahoo. Rii yari, eeta haba majin geenyik kwodii wo mukuchiken eena yar.

⁹ Diita haba rii eeta haba siiken. Diita haba rii yarek, eyey nosapek tawa ma mima yenya okoreechichu. ¹⁰ Diita maji rii diita nosapek tarek, God riita diita nosapen riitak otiiri, diita nosapek tar ma mima ye, riina saka sumowurek. ¹¹ Rii riiti nosapek iri, eeta ma mima ye saka riina yarek. ¹² Wowak, ma kaw ye riina yar. Yari, ye riina hiki siitiichiri, ye eeta kiki siirek, ye eeta God riiti yikapwa siikiita. ¹³ Eeta yikadey ma mima ye pin, omun yimowukasakech. Ma otii tawa abon

yimowukasakech. Yaho. God riita otiiniga ye sokwa riiti yikapwa siir.

¹⁴ Eeta Maji rii mak siirek, noti nediik tawa. Tawak, no ri hadabas boboyen her. Diita hadabas boboy sii rukusii tawa boboy omutiik tawa boboy takiikiisiir. Rii Apoko God riiti podareba yikapwa tarek, eena diita hadabas boboyen riina har. ¹⁵ Jon rii riiti majin geenyik kwodii wor. Eecha kwodii wor: “Diita ma riina ada kwona eecha wori, ‘Ana komas yakiitawa ma rii eeta eeji Harapa. Mashi rii tar nedii ada takasakech. Yaho.’ ”

¹⁶ Nota eyey riitaka tawa rukusii tawa boboyen nota eyey eechaba eechaba yatakiita. ¹⁷ God riita lon Moses riitak har. Wowak, rukusii tawa boboy omutiik tawa boboy sii eeta Jisas Kraist riitak yar. ¹⁸ Ma por keena God riiti misoman hekasakech. Riiti yikapwa podareba riita riitaka tarek, rii eeta Godega tawak, rii riina geenyik kwodii wochar.

UKU YEECHITAR JON RII MAJI KWODII WOR

¹⁹ Jerusalem akamak tar Ju ma ye nediik tar ma kawen Livai ma kawen yechaka eecha heechirek, Jon riina maji woheken ir, “Mii kapo nama?” ²⁰ Jon riita meejiichi maji veenyikasakech. Riita awasen eecha kwodii wor: “Ada Kraistekasakech.” ²¹ Worek, ye awasen eecha wor: “Mii kapo nama? Mii kapo eeta Ilaija?” Jon rii awasen eecha wor: “Yaho. Ada riitakasakech.” Ye awasen eecha wor: “Mii kapo piirapet tawa?” Rii awasen eecha wor: “Yaho.” ²² Worek, yecha eecha wor: “Mii kapo nama? Na awasen banak, nota keena nona heechirek yar ma yenya sawok.

Miiti hi kapo nama habato?” ²³ Worek, Jon rii awasen eecha wor: “Ada diitata: ‘Ayan meejinan biish tawa eemek uwato: Harapa Ma riiti nobon na nagwa nagwa danegwa seechi!’”

Diita majin piirapet Aisaia riita mashi keyir.

²⁴ Perisi ma yecha diita ma yenya heechirek yar. ²⁵ Yecha Jon riina woher: “Mii Kraist riikasakech. Mii Ilaija riikasakech, mii eeta piirapetekasakech. Wowey, boyewak mii ma mima yenya uku yeechitu?” ²⁶ Worek, Jon rii awasen eecha wor: “Ada yenya ukuk ukuyeechitu. Wowak, ma por rii kwoti nediik siiti-itawey, kwo riina hekasakech. ²⁷ Riita ana komas sumowu yatawey, ada saka kiki siikiitawak riiti yatii pokon ada saka heemakiitawak.” ²⁸ Diita maji sii Betani akama Jodan pa pakiireba yepak tarek, eeka bar diita majin. Diita eemek Jon rii ma eeka uku yeechitar.

JISAS RII GOD RIITI SIPSIP YI

²⁹ Kommas yadii pochi siirek, Jon rii her Jisas rii ya riitak yar. Worek, rii hechi eecha wor: “Na he! Dii eeta God Riiti Sipsip Yi. Rii diita nosapek tawa ma mima yechi kapasek boboyen bachi poyi tawa ma! ³⁰ Diita ma riina mashi ada wori apa ada kawka wocho: ‘Ma por rii ana sumowu yari rii eeta eeji Harapa. Mashi ada tanan tar nedii rii tar.’ ³¹ Ada keena riina hekasakech. Kapo nama yato? Ada yarek, man uku yeechitari,

Isrel ma yecha diita ma riina heken eena an mukuchichar.”

³² Jon riita maji yaya geenyik sawor: “Ada her Spirit rii heven heechi sejikiiregba saka tawaga eecha ya sakachi eeta ma riitaka tar. ³³ Ada riina saka hechawak. Wowak, God riita ana ukuk uku yeechiken heechirek yar. Heechirek, yarek, rii ana eecha wor: ‘Mii hekiita Spirit rii sakachi ma poreka yikiita. Diita ma rii Holi Spiritek uku yeechikiita.’ ” ³⁴ Jon rii kawka eecha wor: “Ada eena siiken her. Dii eeta God riiti Yikapwa.”

JISAS RII DISAIPEL YENYA UWA YAYAR

³⁵ Kommas yadii pochik Jon rii eeka kawka siitiitarek, riiti disaipelel upurus piir riitaka eecha siitiitarek, ³⁶ rii her Jisas rii chishi irek, Jon rii hechi eecha wor: “Na he. Dii eeta God Riiti Sipsip Yi!” ³⁷ Disaipelel upurus piir meejichi hechi riina sumowu eecha ir. ³⁸ Worek, Jisas rii dareboyichi heri, piir riina sumowu icharek, rii piiriina eecha woher: “Ki boy boboyen yeshato?” Worek, piir eecha wor: “Rabai, mii siita akak wato?” Rabai maji siin eecha wocho, Tisa. ³⁹ Jisas rii awasen eecha wor: “Ki na ya he.” Worek, piiriita riitaka i watar akan her. Worek, piir riitaka eecha nedii pochi tar. Hogo siiken otiitar nediiik diitata.

⁴⁰ Ma por diita majin meejichi Jisas riitaka iri, riiti hi Endru. Rii Saimon Pita riiti kumwoy. ⁴¹ Rii ameya i riiti yaka, Saimon, riina i sawor: “Nota hewa eeta Mesaia.” Mesaia diita maji eecha wocho eeta Kraist. ⁴² Endru rii Saimon riina yeechi Jisas riitak ye irek, Jisas rii riina hechi eecha wor: “Mii Saimon, Jon riiti yikapwa. Miiti

hi komas eeta Sipas habakiita.” Diita hi siin eecha dareboyer, Pita, Papa.

JISAS RII PILIP, NATANIEL PIIRIINA UWAR

⁴³ Kommas yadii pochik Jisas rii Galili nosapek iken otiir. Rii Pilip riina yesha hechi wor: “Mii ya adaka eecha ikiita.” ⁴⁴ Pilip rii Betsaida ma. Endru Pita piiriiti akama. ⁴⁵ Pilip rii i Nataniel riina yesha hechi wor: “Diita ma riina Moses riita lo majik keyiri, piirapet yecha keyibari, no riina diita hewa. Rii eeta Nasaret Jisas, Josep riiti yikapwa.” ⁴⁶ Nataniel rii meejichi awasen eecha wor: “Kapo Nasaret akama boboy kepin yesokwaney, kapo kiki siikiita?” Worek, Pilip rii awasen eecha wor: “Miita na ya he.”

⁴⁷ Worek, Jisas rii Nataniel riita riitak irek, rii hechi eecha wor: “Na he. Rii eeta Isrel ma siiken, Woshepii tawa maji riitaka kaw takasakech!”

⁴⁸ Worek, Nataniel rii awasen eecha wor: “Boy nobok miita ana tar nediik an heri, mii pek me, muk siitiitarek an her. ⁴⁹ Worek, Nataniel rii awasen eecha wor: “Tisa, mii God riiti yikapwa, Isrel yechi aka tabo yima!” ⁵⁰ Jisas rii riina eecha wor: “Mii pek me muk siitiitarek, ada miina wowey, mii ana hiki siitiichichawey, ay, komas miita harapa boboy mayakan hekiita!” ⁵¹ Worek Jisas rii yenya eecha wor: “Ada maji siikenen bato: Heven nubureja tagwa seechi tanak, God riiti ejel ye eeka ichichi yatanak, Ma Yikapwa riitaka eecha takiita. Eecha oti tanak kwo hekiita!”

2

KENA MA POR RII MIMAN YAR

¹ Yadii nedii upurus siirek, ma por rii Kena akamak Galili nosapek mima tapa aken otiirek, Jisas riiti awi sii iibak tar. ² Ye Jisas riina riiti disaipel yechaka yabaken woher. ³ Worek, wain uku hamarek, Jisas riiti awi sii riina eecha wor: “Wain uku eeta hamawa.” ⁴ Worek, Jisas rii siina eecha wor: “Mima, dii niji yokasakech. Yaho. Eeta eeji yo. Ada eena otiik tawa nedii saka yatawak.” ⁵ Worek, Jisas riiti awi sii yo otiitar wakasa ma yenya eecha wor: “Riita kwona boy majin wonyey ii napa sumowu otii ta.”

⁶ Sikas papa awo eeka tari, Ju ma yechi lotu uku yatar awo. Diita awo tari, podar rii 20 galen ukun siivatar. ⁷ Worek, Jisas rii eecha wor: “Ukun na yeechi yaya awok gwotii.” Worek, yecha siiv takiikiisiir. ⁸ Worek, rii yenya eecha wor: “Kwota na kaw gwotiichi ye i aboboyen siitii kowu tawa ma riina ha.” Worek, ye ye ir. ⁹ Ye irek, diita mashi uku sobo tar wain ma rii yeechi a her. Rii hekasakech eeta wain uku sii kapo siitak taren yar. Wowak, uku yon otiitar ma ye her. Worek, aboboyen siitii kowu tar ma rii mima tapa aken otiitar ma riina uwa yayar. ¹⁰ Uwa yayeichi riina eecha wor: “Eyey ma ye wain kepin mapo homochichu. Komasa ma ye nokwapa nokwapa awak, ye kaw kapasek kepi a tawa wain ukun homochichu. Wowak, mii eeta wain uku kepin egesii heechi tari, apak mii yayato!”

¹¹ Dii eeta Jisas riita mapo mirakel tasiichi otii mukuchir. Kena akamak Galili nosapek eeka otii mukuchir. Riiti hadabas boboyen geenyik mukuchiken eena otii. Eecha otiirek, riiti dis-

aiapel ye eena hechi riina hiki siitiichir.

¹² Dii hamarek, Jisas rii riiti awi siitaka, riiti kumwoy yechaka, disaipel yechaka ye Kapaneam akamak ir. Irek, ye nedii kaw eeka i siir.

*JISAS RII HARAPA LOTU AKAK BOBOYEN
TOKOTAR MAN YEECHI RABOR*

¹³ Ju ma yechi Pasova nokusha a nedii sayarek otiitarek, Jisas rii heechi Jerusalem akamak ir.

¹⁴ Harapa lotu aka wok ma ye bulmakawen, sipsipen, nuriiren tokotarek, her. ¹⁵ Hechi Jisas rii pokon yeechi kubu pichawa pokon otiichi rii eyey sipsipen bulmakawen kikir poyi pakachi yan tokotar cheyen dabuchirek, ya mani saka i ye yar. ¹⁶ Worek, rii nuriirek tokotar ma yenya eecha wor: “Na yeechi ye i. Kwo opoche eeji Apoko riiti akak awobak otiitanakech!” ¹⁷ Worek, riiti disaipel ye mashi keyir majin eena hikitar. Diita maji sii eecha wor: “Ada miiti akan hakok otiitawey, hik uwunaga an eecha meejito.”

¹⁸ Worek, Ju ma ye riina eecha wor: “Mii bwimey boboy nona mukuchikiita diita yo eeta miiti yo?” ¹⁹ Worek, Jisas rii awasen eecha wor: Kwota diita God riiti akan na dagiinak, yadii pi-iriichar ada kawka otiikiita.” ²⁰ Ye meejichi riina eecha wor: “46 sukwiya eecha otiir aka! Mii boy eecha hikitu yadii piiriichareba ada otiikiita!”

²¹ Wowak, eeta akan riita wori, riiti maban eena wor. ²² Kommas Jisas riina tiiriimok chirek, awasen ya sokwarek, riiti disaipel ye eeta majin hikir. Hikirek, ye mashi keyir maji siin Jisas riita bar majin ye eena hiki siitiichir.

JISAS RII EYEW MAN HE HAMATO

²³ Jisas rii Jerusalem akamak tarek, nokusha atarek, riita harapa yon otiirin, ma mima ye eena hechi hiki siitiichir. ²⁴ Wowak, Jisas yenza hehar hikikasakech. Rii eyey man he hamatawak, eena rii hehar hikikasakech. ²⁵ Rii eyey man sugu wopun he hamato. Riina maka sawokasakech. Rii boyen doponak iin ma yecha oti tawa abon sawo mukuchik.

3

JISAS RII NIKODIMAS RIITAKA MAJI EECHA BATAR

¹ Ma por rii tari, riiti hi Nikodimas. Rii Perisi ma tarek, Ju yechi harapa ma. ² Eeta ma rii Jisas riina niyik yarek, eeche wor: “Tisa, no hecho mii eeta God riita heechirek yar Tisa. Ma por God riitaka tanan siiney, riipa diita yikadey mirakelen eeche otiikasakech.”

³ Jisas rii awasen riina eeche wor: “Eeta siiken ada miina wocho ma por kawka yimowunan siiney, riipa God riiti kigdom iyarekasakech.”

⁴ Nikodimas rii awasen riina eeche wor: “Boyega siichi harapa ma siirin kawka yimowukiita? Kapo awi siiti biik iyarenak, kawka yimowukiita?”

⁵ Jisas rii riina eeche wor: “Ada miina maji wocho, ma por rii ukuka Spiriteka yimowunan siiney, riipa saka God riiti kigdom iyarekiitawak.

⁶ Omu sii omu tawa boboy yimowutu. Spirit rii spirit tawa boboyen yimowutu. ⁷ Opoche kwo eena nyegiirabotanakech. ‘Kwota na kawka yimowu.’ ⁸ Sowa sii sokwa yatawey, siiti yok yato. Wowak, kwuku taweyn kwo eena meejitawak, sii

sokwa ya tawa eem ichawa eem kwo hekasakech. Sii eeta nokwapak Spiriten yimowu tawaga eecha otiito.”

⁹ Nikodimas rii eecha wor: “Eeta boboy sii kapo shecha tawa?” ¹⁰ Jisas rii awasen riina eecha wor: “Mii Isrel ma yechi harapa tisa tawey, boyewak mii somoyeto? ¹¹ Ada miina maji siikenen wocho: Nota batawey, nota hechawa boboyen eena bato. Nota sawotawey, nota her boboyen eena sawoto. Wowey, kwota nota sawo tawa majin magiirechichu. ¹² Ada kwona nosapek tawa eyey boboyen eyey wori, kwo eena hiki siitiichikasakech. Howuk tawa boboyen ada kwona wonyey, kwopa kapo shecha hiki siitiichikiita? ¹³ Ma por hevenek i yokasakech. Yahoo. Ma Yikapwa riiba hevenek tarin ya sakar. ¹⁴ Moses riita biish tar eemek, hopon yesokwa howuk seechirega, Ma Yikapwa riin napa eechaba yesokwa howuk seechi. ¹⁵ Wonyey, eeta ma yepa eechaba eechaba tawa boboyen yatakiita.

¹⁶ “God riita diita nosapek tawa man rukusiterek, rii riiti Yikapwa podareban heechirek yar. Eeta ma rii riina hiki siitiichichawey, riipa hakasakech. Riipa eechaba eechaba takiita. ¹⁷ God riita riiti Yikapwan heechirek yari, saka nosapek tawa man anasaken eena heechirek, yarek. Yahoo. Yenya yesokwa yichaken eena heechirek yar. ¹⁸ Ma por Jisas riina hiki siitiichinyey, riipa anasakasakech. Ma por riina hiki siitiichinyan siiney, riipa anaseechi sii siiken siikiita. Rii God riiti Yikapwa podareba riina saka hiki siitiichicharek, eena sii siiken siikiita. ¹⁹ Anasak tawa boboy si mu diitata: Haba diita

nosapek heechirek yari, ma ye niyi nobon kwoya hechawak, haba eena yuyato. Yecha kapasek boboyen otiitawak, eena ye eecha otiito. ²⁰ Ma ye kapasek boboyen otiitawey ye eeta haban yuyatawak, ye eena habak yakasakech. Rii riiti kapasek boboyen habak yayaniga habak geenyik mukuchinyakech. ²¹ Wowak, ma rii God riiti yon sumowuchi, otiitawey, rii eeta habak yato. Yatawak, ma kwo napa riina heech rii God riina sumowu tawak, yo kepin otiitawak, rii eena yato.”

JON RIITA JISAS RIITA YAR MUN GEENYIK KWODII WOR

²² Dii hamarek, Jisas rii heechi Judia nosapek ir. Rii i yechaka eecha tarek, rii yenya uku yeechir. ²³ Jon rii eechaba Inon akamak Selim akamak bana bana tarek, uku yeechibatar. Harapa uku eeka tarek, eena uku eeka yeechitar. Ma mima ye riitak yarek, rii yenya uku yeechitar. ²⁴ Eeta nedii Jon riin poko jikasakech. Kommas poko jir.

²⁵ Jon riiti disaipel ye eeta nedii Ju ma yechaka uku yeechitar majin eena awasen awasen batar. ²⁶ Worek, ye Jon riitak ya riina wor: “Tisa, mii her Jodan pa yepak chishitar ma riina miita wori mii kapo hikitu? Wowak, rii man uku yeechi tawak, eyey ma riitabak ichu!” ²⁷ Jon rii meejiichi yenya awasen eecha wor: “Hevenek yana boboyen yanan siiney ma boyega shecha yakiita? ²⁸ Kwota mashi ada bar majin meejiir. Ada eecha wor: ‘Ada Kraistekasakech. Yaho. God riita ana heechirek, mapo yari nobon ada takiiseechi taken eena yar.’ ²⁹ Ma por mima yaken otiiney, eeta mima sii eeta

riiti. Wowak, mima yawa ma riiti nareboy rii siitii eena wageteyetu. Rii mima yawa ma riiti ayan meejinak, rii eeta kwoya hikitu. Eeta nobon ada eeta kwoya hikitu. ³⁰ Rii sa ya harapa siinak, ada ye i karakada siikiita.”

³¹ Howuk yar ma rii eyey boboyen rii eyey boboyen rii howuk tawa. Ma rii nosapek taren heechi yari, rii eeta nosap ma. Rii diita nosapek tawa majin eena bato. Hevenek heechi yar ma rii eyey boboyen howuk tawa. ³² Rii sawotawey, riita meeji bobyen her boboyen eena sawoto. Sawotawey, ma por eena meeji kiikiiriina neekikasakech. ³³ Wowak, ma por rii diita majin meeji kiikiiriina neekitawak, rii eecha wocho, “God rii eeta siiken.” ³⁴ Diita ma riina God riita heechirek yari, riita God riiti majijn kwodii wocho. God riita riina Spiriten hawey, takiikiisiinak, eena rii kwodii wocho. ³⁵ Apoko rii riiti Yikapwa riina rukusiitawak riiti eyey boboyen riitaban har. ³⁶ Ma rii Yikapwa riina hiki siitiichichaney, riipa eechaba eechaba takiita. Ma rii Yikapwa riiti nobon sumowunan siiney, riipa eechaba eechaba tawa boboyen yakasakech. Iipa God riiti owuka tawa boboy eeta ma riitaka eecha siikiita.

4

JISAS RII SAMERIA TAR MIMA SIITAKA MAJI BAR

¹ Eeta nedii pochik Perisi ye maji pochin eecha meeji: Jisas riita nokwapa nokwapa ma miman yeechi uku yeechi hamar. ² Wowak, ii Jisas riita uku yeechikasakech. Riiti disaipel yecha keena uku yeechir. ³ Jisas riita her, Perisi ye eeta meeji.

Worek, rii Judia nosap heechi Galili nosapek ir.
⁴ Eeta nobo sii i Sameria yechi nosapek i ichar.

⁵ Worek, rii i Sameria yechi nosapek tarek i Saika nosapek iyarer. Nosap Jekop riita iiti yikapwan har nosap tar eemek ir. ⁶ Jekop riita kwotiir wokebi eeta eemek tar. Tarek, Jisas rii ichari, riiti maba nomuyarek, rii eeta wokebi tar eemek eeka he yi hapakatar. Otii atawa mayi tarek, yichar.

⁷ Sameria mima pochi sii uku siiviiken yar. Yarek, Jisas rii siina eecha wor: “Nija ukun na siiviichi ana ha.” ⁸ Riiti disaipel y akar akamak aboboyen tokoken i hamar. ⁹ Worek, eeta Sameria mima sii awasen Jisas riina eecha wor: “Mii Ju ma. Ada Sameria mima. Boyewak miita ana ukun wohecho?” Ju ma ye Sameria ma yechaka awasen awasen geyekasakech. ¹⁰ Jisas rii awasen siin eecha wor: “Nija God riita hatawa boboyen hikiyega, ninya ukun wohewa ma riina nija heyega, nicha riina wohewaga rii waga ninya eechaba eechaba tawa uku kepin ninya hawa.” ¹¹ Mima sii riina awasen eecha wor: “Harapa Ma, miita uku siivii heebiya yakasakech. Diita wokebi heyek tawa. Miita eechaba eechaba takiitawa ukun mii siitan yato? ¹² Noti wayega Jekop riita nona diita wokebi ukun otiichi har. Riita, riiti yikapwa, riita asa boboy diita ukun atar. Mii kapa eecha hikitu ada harapa rii kapo karakada?” ¹³ Jisas rii awasen siina eecha wor: “Ma diita ukun ataney, yepa komas kawka uku aken hikikiita. ¹⁴ Wowak, diita ukun ada haken otiitaweym, ma por eena aney, riipa saka borii-

waga kawka reekasiitiitawak. Yahoo. Eeta ukun ada yenya hatawey, iipa uku siiv eemega tanak, siipa eechaba saya tanak yepa keena eechaba eechaba takiita.” ¹⁵ Mima sii riina awasen eecha wor: “Harapa Ma, diita yikadey ukun na ana hanak, anapa saka boriwaga reekiisiinak, ukun kawka ya siiviikiitawak.”

¹⁶ Jisas rii siina eecha wor: “Naja na i niji man uwachi kicha diika eecha ya.” ¹⁷ Mima sii eecha wor: “Ada makasakech.” Jisas rii awasen eecha wor: “Naja ma biish ta maji wochawey, ni siiken woy wocho. ¹⁸ Mashi nija ma yokotapa tar. Eeta ma rii apa nijika tawey, rii niji ma siikenekasakech. Ni eeta siiken wowa.” ¹⁹ Mima sii eecha wor: “An hikitu mii eeta piirapet por. ²⁰ Noti wayega ye diita kwowuk ya yopo wuchi yi God riina woshiato. Wowak, kwo eecha wocho Jerusalem akamak eeka sa God riina kwoyaba hikitanak, kwoyaba ba ta.”

²¹ Jisas rii siina eecha wor: “Mima ni napa eeji majin hiki siitiichicha. Eeta nedii yakiita kwo eeta kwowuk, Jerusalem akamak God riiti hin yesokwatakasakech. ²² Sameria ma kwo kwota God riiti hin yesokwa tawey, kwo saka otii hechawak. Nota God riiti hin yesokwa tawey, nota otii hechaweyn eena yesokwato. Ma yesokwa yichi tawa boboy sii Juk tar heechi yar. ²³⁻²⁴ Eeta nedii sii yato ya apa diita tawak, God riiti hin siiken yesokwa tawa ma ye spirit tawa nobok, omutiik tawa nobok God riiti hin yesokwatakiita. Eeta yikadey man Apoko God riita yeshato riiti hin yesokwataken.”

²⁵ Eeta mima sii riina eecha wor: “An hewa

Mesaia riipa yakiita, riiti hi Kraist. Riipa yanak nona eyey boboyen sawo mukuchikiita.” ²⁶ Jisas rii awasen siina eecha wor: “Diita adaba. Nijika maji bari.”

²⁷ Eeta nediik Jisas ri disaipel ye heechi ri-itak yar. Yarek, ye her Jisas rii mimaka eecha majibatarek ye eena hechi nyegerabor. Worek, ye piiriina majikasakech. Ye siina saka wopoy paka herek, “Boyewak yawa?” Riina saka eecha woherek, “Boyewak mii mimaka maji eecha bawa?” ²⁸ Worek, eeta mima sii siiti heebiyen hey yichi heechi akamak iri, akama yenya eecha wor: ²⁹ “Na ya ma poren he. Riita ada mashi eyey otiitar boboyen kwodii wo hamawa. Rii boy kapo eeta Mesaia?” ³⁰ Worek, ye akaman heechi eyey Jisas riina heken ir.

³¹ Eeta nedii pochik riiti disaipel ye eecha wor: “Tisa, mii naw otii a!” ³² Worek, rii awasen eecha wor: “Eeji aboboy kaw tawey, kwo hekasakech.”

³³ Worek, disaipel ye meejichi awasen awasen bar: “Kapo riina anadii mak aboboyen har?”

³⁴ Jisas rii yenya eecha wor: “Eeji aboboy di-itata: Ana heechirek yar ma riiti inyakan ada otii sumowuken riita ana har yon otii hamakiita. Eetata.

³⁵ “Kwota eeta wocho: ‘Niwiika diipiira kapiira siinak, kow iiviikiita.’ Wowey, ada kwona wocho: Kwota na nowon he yeyi ta. Kow iivii nedii bana siito.! ³⁶ Ma rii sagan yeechi yopo yichi tawey, rii eeta yan yatawey, eechaba eechaba tawa ma yechi sagan yato. Eecha otiwoy hikitu. ³⁷ Eena diita maji eeta siiken: ‘Ma kaw nowo sagan otii tawak, ma kow iiviito.’ ³⁸ Ada kwona heechirek

iri, kwota yo otiinan siir nowon kow iiviikiin eena heechirek ir. Mashi anadii mak otiiri, apa kwo saga kepin yato.”

³⁹ Nokwapa nokwapa Sameria ma ye Jisas riina hiki siitiichir. Eeta mima sii eecha wor: “Eyey boboyen ada otiitarin, rii geenyik kwodii wor.” Eena yecha Jisas riina hiki siitiichir. ⁴⁰ Worek, Sameria ma ye riitak ya riina woher: “Miita na notaka eecha ta.” Worek, Jisas rii yadii upurus eeka tar.

⁴¹ Nokwapa nokwapa ma ye riiti majin meejichi ye hiki siitiichir. ⁴² Ye eeta mima siina eecha wor: “Saka nija sawowa majiban no meejichi hiki siitiichichawak. Yahoo. Nota riiti kujak bar majin meejirek, eena nota hiki siitiichichu. Nota hikitu diita ma rii diita nosapek tawa man aasen yeechi yesokwa tawa ma.”

JISAS RII GAVMAN MA RIITI YIKAPWAN OTII KEPI SIIR

⁴³ Jisas rii yadii pochi siichi Galili nosapek heechi ir. ⁴⁴ Jisas rii geenyik wor: “Piirapet rii riiti akaman hi takasakech.” ⁴⁵ Rii Galili nosapek iyarerek eeta Galili ma ye inyaka kwoya woy hikir. Ye Jerusalem Pasova nokusha atar nediik i riita otiitar tobon hebar. Eena ye kwoya hikitar.

⁴⁶ Jisas rii Kenan Galiliyaka eeka ir. Eeta eemek rii wain ukun eeka otiir. Eeka tarek, gavman ma por rii riiti yikapwa Kapaneam akamak hak otiitar. ⁴⁷ Eeta ma rii meejiri Jisas rii Judia nosap heechi Galili nosapek i majin meejir. Worek, rii i riina hechi eecha wor: “Miita na Kapaneam akamak yanak eeji yikapwan oti kepi siik. Rii

kiiriidiichiken otiito.” ⁴⁸ Jisas rii riina eecha wor: “Kwo harapa mirakellen henyan siiney, kwo eena hiki siitiichikasakech.” ⁴⁹ Worek, gavman ma rii eecha wor: “Harapa, miita na adak ameya. Opoche eeji yikapwa hatanakech.” ⁵⁰ Jisas rii awasen eecha wor: “Na i. Miiti yikapwa eetapa kepi siikiita.” Worek, eeta ma rii riita bar majin hiki siitiichi heechi ir. ⁵¹ Rii nobon icharek, riiti yo otiitar wakasa ma ye ya riina nobok jawor. Jaworek, ye riina eecha wor: “Miiti yikapwa eeta tawa!” ⁵² Rii meejichi yenya woher: “Boy mey aua hageyegawa?” Ye awasen eecha wor: “Hogo yadii nediik maba hi uwutar boboy sii saka iwa.” ⁵³ Worek, apoko rii eeta auaka meejichi tarek, Jisas rii eecha wor: “Mi yikapwa apa eeta meseka takiita.” Worek, eena rii riiti yimana yechaka hiki siitiichir. ⁵⁴ Jisas rii Judia nosap heechi Galili nosapek iyarerek, mirakel upurus eeka otiir.

5

JISAS RII MA POREN PAK OTIINIGA KEPI SIIR

¹ Nedi pochi siirek, Ju ma yechi nokusha atawa nediin sayarer. Worek, Jisas rii Jerusalem akamak yo ir.

² Jerusalemek sipsip yechi aka nuberejak pa pochi eeka bana bana tar. Eeta pa siiti hi Betesda. Ma yichar aka yokotapa eeta pa giirebak siitii tar. ³ Eeta aka ye nokwapa nokwapa hak otiitar ma yecha watar. Miy dumutar ma, yatii hatar ma, yatii neeki ma eeka watar. Ye wa uku boro sokwaken eena kowutar. ⁴ Nedi pochi Harapa riiti ejel rii eeta pak yi i uku borowon sabwey

tarek yatar. Worek, eecha otiitarek, ma por rii mapo i eeta pak ye i rumuchi sokwari rii kepi siir. ⁵ Worek, ma por rii eeta akak watari riita hak otiitar boboy 38 sukwiya eecha tar. ⁶ Eeta ma rii watarek, Jisas riita i heri rii keen mashi mashik haken otiitarek wabatar ma. Worek, Jisas rii riina eecha wor: “Mii boy ada otii kepi siiken hikitu?” ⁷ Hak otiitar ma rii awasen eecha wor: “Harapa Ma, ada uku boro wokwanak, i ye iken otiitawey, nama ana yeechi hey heechik? Ada eeta pak i ye ik otii tawey, ana anadii ma yecha heechi mapo i ye itu.”

⁸ Worek, Jisas rii eecha wor: “Na sokwa miiti wa gwosen yeechi siitii chishi ta.” ⁹ Worek, eeta ma rii ameya wa gwosen yeechi sokwa siitii chishir.

¹⁰ Eeta nedii akamak siitar nedii. Eena Ju ma yecha otii kepi siir ma riina eecha wor: “Diita akamak siitawa nedii. Miita miiti wa gwosen kiyaniga yawey, eeta noti lon mii reekiwa.”

¹¹ Worek, rii awasen yanya eecha wor: “Ana otii kepi siir ma riita ana eecha wor: ‘Wa gwosen na yeechi kiya siitii chishi i.’” ¹² Worek, ye riina woher: “Nama miina wochuwak miita wa gwosen yeechi kiyaniga chishitu?” ¹³ Worek, otii kepi siir ma rii riina saka hikirek. Nokwapa nokwapa ma mima eeka tarek, Jisas rii i heechi ir. Eena rii saka hikitarek.

¹⁴ Kommas Jisas rii riina harapa lotu akak hechi eecha wor: “Na he. Mii eeta kepi tawa. Kommas kapasek boboyen kawka otiikasakech. Iipa harapa kapasek boboy miitak kawka yakiita.” ¹⁵ Worek,

eeta ma rii i Ju ma yenya wor: “Ana otii kepi siir ma rii eeta Jisas.”

¹⁶ Eecha otiirek, eena Ju ma ye riina kikireken hikitar. Boyewak? Riita akamak siitawa nediik eeta boboyen otiirek, eena kikirek hikitar. ¹⁷ Jisas rii yenya eecha wor: “Eeji Apoko riita yo otii i di-ita apa nedii ada eena eechaba otiito.” ¹⁸ Worek, eena Ju ma yecha Jisas riina sowakwoken kwotay siitiichichar. Boyewak? Saka riita akamak siitawa nediiban reekiirin riita eecha wor: “God rii eeta eeji Apoko.” Eeji wori, rii eecha wor: “Ada eeta Godebaga siir.”

APOKO GOD RIITA RIITI YIKAPWAN MAJI BAR BOBOYEN HAR

¹⁹ Jisas rii awasen yenya eecha wor: “Eeta siiken bor: Yikapwa rii saniga yon keena keena otiikasakech. Rii Apoko riita otii taweyn hechi rii otiito. Apoko rii eyey boboyen otiitawey, Yikapwa rii otiibato. ²⁰ Apoko rii eeta Yikapwa riina rukusiitawak, rii eyey boboyen otiitaweyn rii riina mukuchichu. Kommas riipa riina harapa yo mayakan mukuchinak, diita otii tawa yon dagaar poyekiita. Otiinak kwo nyegiirabokiita. ²¹ Apoko rii ha tawa man yesokwa yichi tawaga Yikapwa riipa eechaba ha man yesokwa yichibakiita. ²² Apoko rii ma poren anasakasakech. Eeta anasak tawa yo rii Yikapwa riitaban ha hamar. ²³ Ma rii Apoko riiti hin yesokwa tawaga Yikapwa riiti hin eechaba yesokwabataken anasak tawa boboy eena har. Ma por rii Yikapwan riiti hin yesokwanan siiney, Yikapwan heechirek yar Apoko riiti hin yesokwakasakech.

²⁴ “Ayo, ada kwona maji siikenen wocho: ma por rii eeji maji hiki siitiichinyey, ana Apokok heechirek yarin hiki siitiichichaney, ri-ipa eechaba eechaba takiita. Eeta ma rii ya anasakasakech. Ha tawa boboyen rii heechirek, rii eechaba eechaba tawa.

²⁵ “Ada kwona maji siiken wocho: yak otiitar nedii, sii apa diita yawa ha tawa ma yepa God riiti Yikapwa riiti ayan meejiikiita. Meejinak, yepa eechaba eechaba takiita. ²⁶ Apoko rii eechaba eechaba tawa boboy mu tawak, rii Yikapwa riina diita boboyen harek, rii eeta eechaba eechaba tawa boboy mu tawa. ²⁷ Jisas rii Ma Yikapwa si-iken tawak, eena God rrita anasak tawa boboyen riiti tapak har. ²⁸ Kwo eena i hiki yo hikikasakech. Eeta nedii yanak, tiiriimo supuk tawa ma ye riiti ayan meejiikiita. ²⁹ Meejinak, yepa tiiriimon heechi geenyik ya sokwakiita. Wonyak, yo kepin otii tawa ma yen yesokwa yichinak, yepa eechaba eechaba takiita. Yo kapaseken otii tawa ma yen yesokwa yichinak ye anasakiita.

KRAIST RIITI YO SII EETA RIINA HEEMA PAKACHICHU

³⁰ “Adaba keena saniga eeji inyakak hikichi oti-ikasakech. Apoko God riita ana har maji bak eeka an anasakiita. Ada eeji inyakak otiikasakech. Yahoo. Ada ana heechirek yar Apoko riiti niyakak otiitawak, eena eeji anasak tawa boboy sii eeta siiken.

³¹ “Ada mayama eeji hiban kwodii wochaney, ii maji siikenekasakech. ³² Wowak, akar tawey,

riita eeji hin geenyik kwodii wo sawo mukuchitakiita. Wochawak an hecho ana kwodii wo mukuchichawa maji sii eeta siiken.

³³ “Kwo Jon riina heechirek iri, rii maji siikenen kwodii wo hamar. ³⁴ Sakayekasii eeji mun kwodii wochawey. Ada diita majin batawey kwona yesokwa yichaken eena bato. ³⁵ Jon rii eeta habaga tarek, rii man okoree mukuchichar. Worek, kwoti inyaka wopu riiti haban ameda kwoya hechi siir.

³⁶ “Wowak, boboy kaw tawey, sii Jon riita heema pak tawa boboy siin dagiir poyechi eeji mun kwodii wocho. Ada otii tawa yo siita ana mayama heema pakachichu. Eeji Apoko riita ada otiiken har yo siita ana geenyik kwodii wo mukuchichu. Sii eecha wocho Apoko riita ana heechirek yar. ³⁷ Ana heechirek yar Apoko riita eeji mun kwodii wocho. Kwo riiti ayan meejikasakech. Riiti misoman hekasakech. ³⁸ Riiti maji kwoti wok takasakech. Riita heechirek yar Yikapwan kwo hiki siitiichikasakech. ³⁹ Kkwo hikitu kwo mashi keyir majin kenyitaney, kwopa eechaba eechaba takiitawa boboyen yeshaniga hekiita. Kwota eecha otiitawey, ii mashi keyir maji eeta ana kwodii wo mukuchichu! ⁴⁰ Wowak, kwo eena adak ya eechaba eechaba tawa boboyen yakasakech.

⁴¹ “Ada saka chishi ye i tawak, ma yecha eeji hin yesokwataken. ⁴² Wowak, ada kwona hecho. Kwota kwoti sugu wopuk God riina rukusikasakech. ⁴³ Ada eeji Apoko riiti hik yari, kwo ana saka yarek. Ma por rii riiti hik mayama

yaney, ii kwopa riina yakiita. ⁴⁴ Kwota yaka kumwoy kwoti hin mayama yesokwato. Wowak, kwo yo otiikasakech God riita kwoti hin yesokwaken. Eecha otiitawey, boyega shecha kwota hiki siitiichikiita? ⁴⁵ Kwo hikitanakech anapa Apokok i kwona maji bakiita. Moses rii Apoko riitak i kwona maji sawokiita. Diita Moses riina kwo eecha hikitu riita kwona kiyatayekiita. ⁴⁶ Kwota Moses riiti majin hiki siitiichiyega, ii waga eeji maji eechaba hiki siitiichiwa. Riita eeji hin keyichir. ⁴⁷ Riita keyirin kwota hiki siitiichinyan siiri, boyega kwo eeji majin hikikiita?”

6

JISAS RII 5,000 MAN HAVAR

¹ Worek, komas Jisas rii Galili pagiiriiba yepak heechi ir. Siiti hi Taibirias pa. ² Ma yecha Jisas riita otiir mirakellen herek, hak oti tawa man oti kepi siirin herek, nokwapa nokwapa ma mima yecha sumowuchishitar. ³ Jisas rii kwowukheechi yo iri, riiti disaipel yechaka eecha yichar. ⁴ Ju ma yechi Pasova nokusha nedii bana bana tar. ⁵ Jisas riita mey maka hecharek her nokwapa nokwapa mima ma ye riitak yatari, rii Pilip riina eecha wor: “Nopa aboboy siitan tokochi diita eyey ma mima yenza havakiita?” ⁶ Rii Pilip riina oti heken eena wor. Rii her riita otiik tawa yon rii her.

⁷ Pilip rii awasen eecha wor: “Nota 200 dola tokona gey jecha yuwa ma sakapa kiki siikitawak?” ⁸ Akar disaipel por, Endru, Saimon Pita riiti kumwoy, rii eecha wor: ⁹ “Hadiiyey

yikapwa por diik tawey, rii gey yokotapa heechi tawak, emiyep upurus eecha heechitu. Wowey, kapo apa jecha yuwa ma sakapa kiki siikiitawak.”

¹⁰ Worek, Jisas rii eecha wor: “Eeta ma mima yenya na wochinak sa hey yi.” Eeta eem nokwapa nokwapa wohijaka eecha tar. Eeta yir ma ye 5,000 ma eecha tar.

¹¹ Yecha yirek, Jisas rii God riina woshi eechi geyen yeechi yichar ma yenya homachi hapwoy pakar. Worek, rii emiyep piiren eechaba otiibar. Yenya hari ye eeta kiki siir. ¹² Worek, ari kiki siirek, rii disaipel yenya wor: “Aboboy kaw tawey, na yaya podat eemek yopo yichi. Iipa kaw wurubu yarebokiita.” ¹³ Worek, ye eyey yopo yicharek, bali gey chipen wasiihaya kwo yokotapa woyichi yichir. Eeta ma ye ari kiki siirek, kaw eechaba tar.

¹⁴ Worek, eeta ma mima ye riita eecha oti mirakel herek ye eecha wor: “Eeta siiken diita piirapet rii diita nosapek yar!” ¹⁵ Jisas rii heri, yecha riina neekichi ye i aka tabo yima heken otiitar. Worek, riita kawka eena heechi kwowuk saniga yo ir.

JISAS RII PA HEK HOWU CHISHITAR

¹⁶⁻¹⁷ Hogo nedii siirek, Jisas ri disaipel ye i pak ye i jabiir yeechi Kapaneam akamak iken ichari, nobok niy siirek Jisas rii yen saka i hecharek.

¹⁸ Worek, harapa sowa yarek, hisaw uku boro sokwar. ¹⁹ Worek, yecha jabiiren eyika ichari 2 mail-3 mail tarek, ye her Jisas rii eeta pa hek how irek, i jabiirek bana bana siirek, disaipel ye hechi akiitar. ²⁰ Worek, Jisas rii yenya eecha wor: “Dii

eeta ada yato! Opoche akiitanakech.” ²¹ Worek, yecha iken otiitar eemek gayer.

EYEEY MA MIMA YE JISAS RIINA YESHATAR

²² Iy nedii eeta ma ye eeta pagiireba yepak i tar. Tarek, ye heri jabiir podateba woy tar. Ye her Jisas rii eeta disaipel yechi jabiirek ikasakech. Disaipel ye jabiirek Jisas riina heechi ir. ²³ Worek, akar jabiir, Taibirias yechi jabiir, ya eeta ma mima yecha geyen yi ar eemek, Harapa riita God riina woshiatar eemek, eeka ya gayer. ²⁴ Eeta ma mima ye Jisas riina disaipel yechaka eecha hipurek, yecha jabiirek i ye irek Kapaneam akan man Jisas riina yesha heken eena ir.

JISAS RII HEVENEK TAWA GEY

²⁵ Worek, ye riina yeshaniga pagiireba yepak her. Herek, ma mima ye riina woher: “Tisa, mii siitiyekega yar?” ²⁶ Jisas rii yenya awasen eecha wor: “Eeta siiken woy ada kwona wocho: kwo saka eeta mirakelen ya heren kwo ana ya yesha hek yawak. Yahoo. Kwota eeta geyen ari biidiirek, eena kwo ana yesha hek yawa. ²⁷ Kwo opoche kwopa siitii tawa aboboyen yaken otiitanakech. Yahoo. Kwo na eechaba eechaba tawa ma yechi aboboyen yaken gegi ya ta. Ma Yikapwa riipa eeta yikadey aboboyen kwona hakiita. Eeta Apoko God riita riina otii yon riiti hik har.

²⁸ Worek, ye riina woher: “Nopa kapo shecha otiinak, God riiti yon nopa otiikiita?” ²⁹ Jisas rii yenya awasen eecha wor: “Diita yikadey yon God riita kwota otiiken gegiyato: riita heechirek yar ma riina na hiki siitiichicha.”

³⁰ Worek, ye riina wor: “Boy mey mirake boboyen otiinak nota miina hiki siitiichikiita? Mii kapo boyen otiikiita? ³¹ Noti wayega ye manan me biish tar eemek eeka atar. Mashi keyir maji eecha wocho: ‘Rii hevenek tar geyen yenya harekar.’ ”

³² Worek, Jisas rii yenya eecha wor: “Ada kwona maji siiken wocho: Moses riita kwona hatar geyen ii hevenek ya geyekasakech. Yaho. Eeji Apoko riita hevenek tawa gey siikenen kwona hato. ³³ God riita ha tawa gey sii diitata: rii heven heechi ya sakari diita nosapek tawa man yesokwa yichitu.” ³⁴ Worek, ye riina eecha wor: “Harapa Ma, diita geyen nona na eechaba eechaba ha ta.” ³⁵ Jisas rii yenya awasen eecha wor: “Ada eeta yesokwa yichi tawa gey. Eeta ma rii adak yaney, riipa aboboy eecha hakasakech. Eeta ma rii ana hiki siitiichinyey, riipa borowaga reekasiikasakech.

³⁶ “Wowak, ada kwona wor: kwo ana heri, kwo ana hiki siitiichikasakech. ³⁷ Eyey ma miman eeji Apoko rii ana hari, yepa adabak yakiita. Ma adak yaney, anapa saka yen magiirechichi otii poyekitawak. ³⁸ Ada heven heechi ya sakari, saka ada hiki tawa abon otiik yarek. Yaho. Ana heechirek yar Apoko riiti inyakak tawa boboyeban otiiken yar. ³⁹ Ana heechirek yar Apoko riiti inyakak tawa boboyen ada diina otiitaken eyey ma miman rii ana hari, ada por heechikasakech. Yaho. Hamak tawa nedii anapa yenya eyey yesokwa yichikiita. ⁴⁰ Dii eeta eeji Apoko riiti inyaka: eyey ma ye Yikapwa riina herin hiki siitiichichaney, yepa eechaba eechaba takiita. Eeta yikadey ma

yen hamak tawa nedii yanak, anapa yen yesokwa yichakiita.”

⁴¹ Jisas rii mashi eecha worek, “Ada eeta hevenek taren ya sakar gey.” Eena Ju ma ye riina ow maji awasen awasen batar. ⁴² Eena ye eecha wor: “Dii boy Josep riiti yikapwa, Jisas. Nota riiti nokwapa apokwon hecho. Boyewak rii eecha wocho ada hevenen heechi ya sakar?”

⁴³ Jisas rii yenya eecha wor: “Opoche kwotaba maji awasen awasen batanakech. ⁴⁴ Ana heechirek yar Apoko riita ma poren yeechi yayanan siiney, iipa ma saka adak yakiitawak. Eecha otiiney, ada hamak tawa nedii ada riina yesokwakiita. ⁴⁵ Eeta piirapet yecha keyir: ‘God riipa eyey man pokiitakiita.’ Eyey ma ye Apoko riiti majin meeji tawey, riiti pokii tawamajin meejitawey, yepa adak yakiita.

⁴⁶ “Ma por Apoko riina hekasakech. Yaho. Ma podat riitak eecha taren yari, riitaba her. ⁴⁷ Ayo. Ada kwona maji siikenen wocho: Ma por rii ana hiki siitiichinyey, riipa eechaba eechaba takiita. ⁴⁸ Ada eeta eechaba eechaba takiitawa gey. ⁴⁹ Mashi mashi kwoti yeyi wagega ye me biish tar eemek manan atarek, ye ha hamar. ⁵⁰ Wowak, gey hevenek ya sakarin ma yecha eena aney, yepa hakasakech. ⁵¹ An eechaba eechaba tawa gey an hevenen heechi ya sakar. Ma por riita diita geyen aney, rriipa eechaba eechaba takiita. Diita gey ada riina haney, ii eeta eeji maba omu. Ada eeta boboyen hanak diita nosapek tawa ma yepa eechaba eechaba takiita.”

⁵² Worek, Ju ma ye eena meejirek, maji awasen awasen batar. Ye eecha wochar, “Boyega kata ma eecha wocho riiti maba omun nona hanak akiita?”

⁵³ Jisas rii yenya eeche wor: “Ada kwona maji siikenen wocho: Kwo Ma Yikapwa riiti maba omun anan siiney riiti pin anan siiney, kwo eecheba eecheba tawa boboy takasakech. ⁵⁴ Ma ye eeji maba omun atawey, eeji pin atawey, yepa eecheba eecheba tanak, hamak tawa nedii yenya ada yesokwa yichikiita. ⁵⁵ Eeji maba omu sii eeta aboboy siiken tawa. Eeji pi sii eeta uku kepi tawa. ⁵⁶ Ma ye maba omu eejin aney, eeji pin aney, riita eeji wok tawak, ada riiti wok tawa. ⁵⁷ Eecheba eecheba tawa Apoko riita ana heechirek yar. Riita tawak, ada eena eecheba tawa. Eecheba tawaga, ada otiitawak, ma ye ana aney, riipa eecheba eecheba takiita. ⁵⁸ Diita gey sii hevenek taren heechi ya sakar. Sii mashi wayega yecha eecheba har geyega eecheba takasakech. Yaho. Ma diita geyen aney, iipa eecheba eecheba takiita.” ⁵⁹ Jisas riita Kapaneam lotu akak yenya yopo yichi diita majin pokii tar.

JISAS RII MA EECHABA EECHABA TAKIITAWA MAJI GEENYIK KWODII WOCHAR

⁶⁰ Riiti nokwapa nokwapa disaipel ye diita majin meejichi eeche wor: “Diiti maji hapaga maji. Nopa kapo boyega sheche hikitakiita?” ⁶¹ Jisas rii riiti inyakak mayama her riiti disaipel eena maji awasen awasen batar. Worek, riita yenya eeche wor: “Diita maji sii boy kwoti inyaka wopun kapasek otiwa? ⁶² Wowak, kwota henyak, Ma

Yikapwa riita yar nobok kawka heechi inyey, kwopa kapo shecha hikikiita? ⁶³ Spirit riita man eechaba eechaba kepi ta boboyen hato. Maba omu sii nona kaw kiyatayekasakech. Diita majin ada hatawey eeta Spirit, eeta eechaba eechaba takiitawa boboy. ⁶⁴ Wowak, ma kaw kwotaka tawey, ye hiki siitiichikasakech.” Mashi mashi nediik Jisas rii her ma riina hiki siitiichinyan siiri. Rii hebar ma por riina yabu pi ma siikiita. ⁶⁵ Rii kawka eecha wor: “Eena ada kwona eecha wor, Apoko riita otiichinyan biish siiyega, ma por riipa saka adak yakiitawak.”

⁶⁶ Eeta maji worek, eena nokwapa nokwapa disaipel ye riina heechi irek, riina kawka sumowukasakech. ⁶⁷ Worek, Jisas rii 12 disaipel yenya wor: “Kwo boy kapo ana heechi ibakiita?”

⁶⁸ Worek, Saimon Pita rii awasen eecha wor: “Harapa Ma, nopa namak ikiita? Eechaba eechaba takiitawa maji eeta miitaka eecha tawa. ⁶⁹ Nota hiki siitiichichu no hecho mii eeta God riiti Holi Ma.”

⁷⁰ Jisas rii awasen eecha wor: “Ada boy 12 kwona hisiiir? Wowak, por kwoti nediik tawey, rii kapasek spiriteka eecha tawa!” ⁷¹ Rii Judas, Saimon Iskeriot riiti yikapwa, riina eecha wor. Diita ma Judas rii Jisas riina yabo pi man ye i sawor. Rii yechi nediik 12 tar ma.

7

JISAS RIITI KUMWOY YE RIINA HIKI SIITI-ICHIKASAKECH

¹ Worek, Jisas rii Galili yepak chishi ir. Rii Judia nosapek inyan yuyar. Juda ma yecha riina

sowakwoken otiitarek, eena ikasakech. ² Eeta nedii Ju ma yecha yepaba akak nokusha ar. ³ Worek, eena riiti kumwoy ye riina eecha wor: “Na diina heechi. Judia nosapek i miita otii tawa yon otiinak, mi disaipel ye sa hehar he. ⁴ Ma por rii riiti hin geenyek yesokwaken otiiney, riipa saka boboyen veenyi eemek otiikiitawak. Eeta boboyen otiiken otiiney, na geenyik siitii ma mima yechi misomak otiitanak, ye sa hehar hecha.” ⁵ Jisas riiti kumwoy ye riina hiki siitiichi kasakech. ⁶ Eena Jisas rii yenya eecha wor: “Eeji nedii saka yatawak. Wowak, apa kowti nediibak tawa. ⁷ Diita nosapek tawa ma mima ye kwona yabu pi ma takasakech. Ye adaban yabu pi ma tawa. Ada yecha otii tawa kapasek boboyen ada kwodii wochawak, eena ana yabu pi ma tawa. ⁸ Kwotaba na i nokusha a. Wowak, eeta nokusha a tawa nedii ada apa ikasakech. Eeji nedii saka yatawak.” ⁹ Rii yen eecha wochi rii Galili nosapek tar.

JISAS RII NOKUSHA A NEDIİK IR

¹⁰ Worek, ri kumwoy ye nokusha ak irek, Jisas rii komas sumo ibar. Wori, rii geenyek ikasakech. Rii veenyichi ir. ¹¹ Eeta Ju ma ye noku sha atar nediik riina yeshar. Ye woher: “Eeta ma rii siitak tawa?” ¹² Eyey ma mima ye nokwapa nokwapa maji batar. Kaw ye eecha wor: “Rii ma kepi.” Kaw ye eecha wor: “Rii eyey ma miman woshepiito.” ¹³ Wowak ye Ju ma yenya akiirek, ma por rii geenyik yesokwa bakasakech.

¹⁴ Nokusha a hamak otiitar nediik Jisas rii harapa lotu aka wok iyar maji pokiitar. ¹⁵ Worek,

Ju ma ye i hiki ya hikichi woher: “Rii siitak oti her? Riita i maji pokiikasakech.” ¹⁶ Jisas rii awasen eecha wor: “Ada diita pokiitawa maji sii eejikasakech. Dii eeta ana heechirek yar God riiti maji. ¹⁷ Ma por rii God ri inyakan sumowutaken hikitaney, diita ada sawo tawa maji siiti mun hekiita. Riipa hekiita ada God riiti hin, eeji hin maji pokiitu. ¹⁸ Ma por rii riiti inyakak tawa majin eena sawo tawey ii rii riiti hin mayama sobo yesokwato. Ma por rii heechirek yar ma riiti hiban yesokwataney, ii rii eeta nagwa nagwa nobok ichu. Woshepii tawa boboy eeta ma riitaka takasakech.

¹⁹ “Mashi Moses rii kwona lon har. Wowey, na por kwoti nediik tawey, rii Moses riiti lon sumowukasakech. Wowak, boyewak kwo ana sowakwo haken otiito?” ²⁰ Eeta ma mima awasen riina eecha wor: “Kapasek spirit eeta miitaka eecha tawak, namey mak miina pi sowakwok otiito?” ²¹ Jisas rii awasen yenya eecha wor, “Ada yo podaten otiirin, kwota ana i hiki ya hikir. ²² Moses rii tasiikasakech. Kwoti wayega yecha otiitar abo. Kwota eecha otiitawey, kwota akamak sii tawa nediik, kwo yikapwa maban hichu. ²³ Wowak, kwota yikapwa maban akamak sii tawa nediik hichawak, ii kwo Moses riiti lon reekiinan siiney, ada eechaba akamak sii tawa nediik ma poren oti kepi siiney, boyewak kwo ana kwotayeto? ²⁴ Opoche kwo kwoti miyik shebo shebo homachichanakech. God riiti miso-mak no geenyik homachicha.”

YECHA EECHA WOR, “DIITA MA RII KAPO KRAIST”

²⁵ Jerusalem akamak tar ma mima kaw ye eecha wor: “Diita ma riina yecha kapo pi pi hak? ²⁶ Na he! Rii geenyik kwodii wo majin sawotawak, ma riina majikasakech! Kapo harapa ma ye hecho rii eeta Kraist? ²⁷ Wowak, nota diita ma riiti akama siikenen hecho? Kraist riita diika yanak, riiti akama ma ye hekasakech.”

²⁸ Jisas rii harapa lotu akak tarek, rii yenya uwaba mukuchitar: “Kwo boy eeji heechi yar eemen hebato? Wowak, ada keena saniga yakasakech. Ana heechirek yar Apoko riita oti tawa boboy riita siiken boboyeban otiito. Kwo riina hekasakech. ²⁹ Adaba saniga riina hecho. Riita ana wochirek, an riina heechi yar.”

³⁰ Worek, ye eena riina pok jiken otiir. Wowak, eena ma ye riina tapa neeki hekasakech. Riiti nedii saka yatarek. ³¹ Wowak, nokwapa nokwapa ma mima ye riina hiki siitiichichar. “Kraist riita diika yanak, rii kapo otiina mirakel diita ma riita otiitaweyn dagiir poyekiita?”

YECHA OW ANA PICHAR MAN HEECHIREK JISAS RIINA POKO JIKEN YAR

³² Eeta Perisi ma yecha meejirek, eeta ma ye Jisas riina diita yikadey majin ba ye i tar. Worek, yecha harapa nediiik tar ma yechaka ow ana pichar ma yenya heechirek Jisas riina poko jiken yar. ³³ Worek, Jisas rii eecha wor: “Ada kwotaka ameda teechi anapa heechi ana heechirek yar ma riitak awasen ikiita. ³⁴ Inyak, kwopa ana yesha taney, kwopa saka hekiitawak. Kwopa sakapa ada ikiitawa eemen ikiitawak.” ³⁵ Eena Ju ma ye eecha wor: “Riipa kapo siitak inyak

nopa riina saka hekiitawak? Kapo riipa noti ma kaw Grik nosapek i eeka siinak, yenya maji pokiitakiita? ³⁶ Rii eecha wocho: 'Kwota ana heken yeshataney, kwopa ana saka hekiitawak! Rii kawka eecha wocho: 'Ada inya eem kwopa sakapa yabakiitawak.' Diita yikadey maji si mu, boy?"

EECHABA EECHABA TAKIITAWA UKU

³⁷ Diita nokusha a tar harapa nedii sii eeta hamak tawa nedii. Diita yadiik Jisas rii siita yenya harapa ayak eecha wor: "Ma ye ukun borowagii reekii siiney, ii sapa adak yanak, adapa eechaba eechaba tawa uku kepin hanak, riipa akiita. ³⁸ Mashu keyir majik wori, 'Ma por rii ana hiki siitiichichaney, eechaba eechaba tawa uku siipa riiti biik i takiik siichi gwoyeechi i anadii man kiyatayebakiita.'" ³⁹ Ii Spiriten eena bar. Hiki siitiichichawa ma yepa yataken eena bar. Eeta nedii Spiriten hakasakech. Eeta nedii Jisas rii hadabas boboyen saka ya tarek.

MA MIMA REEKIICHI I YA YA SIIR

⁴⁰ Ma kaw ye eeta majin meejierek, ye eecha wor: "Eeta siiken diita ma rii eeta yaken oti tawa piirapet." ⁴¹ Anadii ma ye eecha wochar: "Ka eeta Kraist." Wowak, ma kaw eecha wochar: "Kapo Kraist rii Galili nosapek sokwachi yaken otiito?" ⁴² Mashu keyir maji sii eecha wocho: Kraist rii Devit riiti yimana riipa Betlehem akamak yakiita. Diita akama eeta Devit riiti akama." ⁴³ Eena ma mima ye reekiichi i ya ya siir. ⁴⁴ Ma kaw ye riina poko jiken otiiri wowak, eeta ma ye riina tapa now neekihekasakech.

*JU MA YECHI HARAPA MA YE JISAS RIINA
HIKI SIITIICHIKASAKECH*

⁴⁵ Worek, ow ana pichar ma ye heechi Ju ma yechi harapa ma Perisi yechaka awasen ir. Irek, ye eecha wor: “Boyewak kwosaka riina yeechi diika yayawak?” ⁴⁶ Ow ana pichar ma ye awasen eecha wor: “Diita nosapek tawa ma por mashi saka kata ma riita batawa majiga batarek!” ⁴⁷ Peiisi ma ye awasen eecha wor: “Rii kapo kwona woshepii tawak, kwo eena woshepii hiki ye itu? ⁴⁸ Kwo boy kapo meejiito Perisi harapa ma Ju yechi harapa ma ye kapo boy Jisas riina hiki siitiichibato? Yaho. ⁴⁹ Eeta yikadey ma mima yecha Moses riiti lon hekasakech. Yecha tawey, God riitimisomak kiiriisiiposii kapasek maga eecha tawa.”

⁵⁰ Worek, Nikodimas rii yechi nediik tar. Diita ma rii mashi Jisas riitak ir ma. Rii eecha wor: ⁵¹ “Noti lo sii boy eecha wocho man nota shebo shebo yaya anasakiita? Yaho. Riita otii tawa abon na mapo hechi riiti majin meejiichi komas yaya anasa.” ⁵² Ye awasen eecha wor: “Mii kapo Galili ma tabato: Mashi keyir majin na hehar kenyi he. Miipa hekiita piirapet por Galili nosapek sokwachi yakasakech.” ⁵³ (-)

8

*MIMA POCHI SII NOBO ANEMESH ROKOTAR
MAJI*

¹ Worek, eyey ma mima ye heechi yechi akak i ye yar. Worek, Jisas rii heechi Oliv Kwowuk yo ir. ² Worek, niyegak rii harapa lotu akak i

yarerek, eyey ma mima ye yar riitak yopo wuchi yir. Yirek, rii yenya maji pokiitar. ³ Ma pochi sii nobo anamesh rokotarek, Perisi ma lon maji pokiitar ma ye siina yeechi Jisas riitak ye i ma mima yechi mi somak siitiichir. ⁴ Worek, ye Jisas riina eecha wor: “Tisa, diita mima sii nobo anamesh rokotarek, ye her. ⁵ Noti Moses riiti lo eecha wocho, eeta yikadey miman nota papak raboto. Mii shecha hikitaney, ii na ba?” ⁶ Ye eecha wori, riina anasa nobon eena otiheri, Jisas rii meejiichi rii saka gamuchi yi nosapen tapamak keyir.

⁷ Yecha siitiitarek, riina wowo hecharek, rii awasen eecha wor: “Ma podar kwotaka tawey, kapasek boboyen biish tawey, riitaba sapa papa podar mapo rabo.” ⁸ Worek, rii way kawka he gamuchi nosapen tapamak kawka keyir. ⁹ Ye eena meejirek, ye podar podar saya ir. Apoko saba tar me ye maporek, anadii ma ye yenya sumowuniga ir.

¹⁰ Worek, Jisas rii siitii mima siina wor: “Mima, ye siitak iwa? Kapo ma por sakapa ninya anasakitawak?” ¹¹ Mima sii eecha wor: “Harapa Ma, makasakech.” Jisas rii eecha wor: “An eechaba ninya anasakasakech. Na i. Kommas ni kapasek boboy kawka otiiksakech.”

JISAS RII DIITA NOSAPEK TAWA MA YECHI HABA

¹² Jisas rii yenya eecha wor: “Ada diita nosap haba. Ma ana sumowuney, riipa saka niyi kiyik chishikiitawak. Yahoo. Riipa eechaba eechaba tawa hababak eeka takiita.” ¹³ Worek, Perisi

ye riina eecha wor: “Mii keena miiti majin mayama sawoto. Eecha sawotawak mi maji eena siikenekaskech.” ¹⁴ Worek, Jisas rii yenya awasen eecha wor: “Ayo, ada mayama tayechi heema pakatawey, eeta siiken. Ada hecho ada heechi yar eem. Ada hecho ada ikiitawa eemen eena eeji maji eeta siiken. Wowak, kwo ada heechi yar eemen hekasakech. Ada awasen ikiitawa eemen hekasakech. ¹⁵ Kwo nosapek tawa ma anasatawaga eecha anasato. ¹⁶ Wowak, ada man anasaken otiiney, nagwa nagwa anasakiita. Adaba saniga takasakech. Ana heechirek yar Apoko rii adaka bana bana tawak, eena ada nagw nagwa anasato. ¹⁷ Kwoti lo eecha wocho: Ma upurus piiriita heemakiitana maji chegiibak siiney, piiriiti maji eeta siiken. ¹⁸ Ayo, ada keena mayama tayechi heemapakato. Wowak, ana heechirek yar Apoko rii ana eechaba heemapakachibato.”

¹⁹ Worek, ye eena eecha wor: “Mi Apoko rii siitak tawa?”

Jisas rii awasen eecha wor: “Kwo ana hekasakech. Eeji Apoko riina kwo hekasakech. Kwota ana heyega ii kwo waga eeji Apoko riina hebawa.”

²⁰ Rii diita majin mani yan heechitar aka wok siitii bar. Eeka Jisas riita harapa lotu akak yenya maji pokii tar. Ma por rii riina pokok jikasakech. Riiti nedii saka yatarek, eena poko jikasakech.

KWOTA SAKA KIKI SIIKIITAWAK ADA IKI-ITAWA EEMEN

²¹ Rii kawka wor: “An ichu. Kwopa saka an kawka hekiitawak. Kwopa hanak, kwoti kapasek boboy siipa eechaba takiita. Kwota saka kiki

siikiitawak, ada ikiitawa eem.” ²² Worek, eena Ju ma ye eecha wor: “Rii eecha wocho, ada ichawa eemen kwopa saka kiki siikiitawak. Diita maji si mu kapo riita mayama pi sowakwok otiito?”

²³ Jisas rii awasen yenya eecha wor: “Kwo kuruk taren yar. Ada howuk taren heechi yar. Kwo diita nosap ma. Ada diita nosapek makasakech.

²⁴ Eena ada kwona wor: kwopa hanak, kwi kapasek boboy eechaba takiita. Kwo diita Ma, ana, hiki siitiichinyan siiney, kwopa hanak, kwi kapasek boboy eechaba takiita.”

²⁵ Worek, yuway riina awasen woher: “Mii nama?” Worek, Jisas rii yenay awasen eecha wor: “Ada diita ma kwona mashi wori. ²⁶ Ada nokwapa nokwapa maji kwota otii tawa abon kwona bak otiito. Komasa ada eeta boboyen anasakiita. Wowak, eeta ma riina heechirek yari, riita otii tawa abo sii eeta siiken. Ada riiti eyey majin meeji tawey, ada iiban ddita nosapek tawa ma mima yenya sawoto.”

²⁷ Riita yenya bari, rii Apoko riina bari, ye riina hekasakech. ²⁸ Eena Jisas rii yenya eecha wor: “Kwota Ma Yikapwa riiti hin yesokwana nedii kwopa eecha hikikiita dii eeta ma riita. Wonyak, kwopa ana eecha hikichi saniga eecha otiikasakech. Eeta Apoko riita ana pokiitar majiban ada iiban kwona sawoto. ²⁹ Ana heechirek yar Apoko rii adaka eecha tawa. Eechaba eechaba nedii ada riiti inyakak otiitawak, rii eena ana heechi ikasakech.” ³⁰ Rii eecha worek, nokwapa nokwapa ma mima ye riina hiki siitiichir.

MA YE EETA MAJI SIIKENEN MEEJITAWEW,

*KAPASEK BOBOY SII YENYA POKOGA
JIKASAKECH*

³¹ Worek, Jisas rii riina hiki siitiichichar Ju ma yenyanya eecha wor: “Kwota ada pokii tawa majin hehar sumowutawey, kwo eeta eeji disaipel siiken. ³² Wonyak, kwopa maji siikeban hechakiita. Wonyey, kwo poko ji maga eecha takasakech.”

³³ Worek, ye riina awasen eecha wor: “No Ebrahim riiti neja. Nota nedii pochi anadii maka poko ji takasakech. Boyewak mii eecha wocho, ‘Kwota poko ji maga takasakech?’ ”

³⁴ Jisas rii yenyanya eecha wor: “Ada kwona maji siikenen wocho: eyey ma ye kapasek boboyen otiitawey, kapasek boboy sii eeta riina pokoga jichu. ³⁵ Poko ji yo otii tawa ma rii akak saka eechaba eechaba takiitawak. Yaho. Yikapwa rii eechaba eechaba takiita. ³⁶ Wowak, eeta Yikapwa rii kwona pokon heema jinyey, eeta heema siiken jiwa.

³⁷ “Ada hecho kwo Ebrahim riiti neja. Wowey, eeji maji kwoti inyakak takasakech eena kwo ana sowakwoken otiito. ³⁸ Diita boboy ana eeji Apokoriita mukuchirin eena ada sawoto. Wowak, kwo kwoti Apokok sawo mukuchichrin, eena kwo otiito.”

KWOTI APOKO RII EETA GABA

³⁹ Ye riina awasen eecha wor: “Noti apoko eeta Ebrahim.” Jisas rii awasen eecha wor: “Kwota Ebrahim riiti neja tawey, ii kwo riita otii tawabaga eechaba otiito. ⁴⁰ Ada God riita har omutiik majin meejirin eetaban ada otiitar.

Wowak, kwo ana sowakwoken otiito. Diita hikichi otii tawa yon Ebrahim rii eechaba otikasakech! ⁴¹ Kwo kwoti apoko riita otiitawa aboga eecha otiito.”

Ye riina awasen eecha wor: “Nota nobok ya yikapwakasakech. Nowi Apoko podareba, eeta God.” ⁴² Worek, Jisas rii eecha wor: “God rii kwoti apoko taney, ii kwo waga ana rukusiito. Ada God riitaka taren heechi ya diita eechaba tawa. Ada sobo yakasakech. Riita ana heechirek an yar. ⁴³ Boyewak kwo saka eeji majin hehar hikitawak? Kwo eeji majin meejinan yuyatawey, kwo mabiya giito.

⁴⁴ “Kwo kwoti apoko, Gaba, riiti yikapwa. Eecha tawak, kwo eena apoko riiti nobon sumowutu. Mashi mashi nedii rii man pi hatar. Ii rii saka nobo kepin sumowu tarek. Maji siiken ritaka eecha takasakech. Rii woshepii ma taweym, rii woshepii tawa boboy yechi apoko. Eena rii woshepii tawak, rii riiti nobobak ichu. ⁴⁵ Ada kwona maji siikenen sawo tawey, kwo eena hiki siitiichikasakech. ⁴⁶ Namey ma por kwotaka riitapa keena adaka tawa kapasek boboy pochin hechi kwona wokiita? Wowak, ada maji siikenen sawotawey, boyewak kwosaka ana hiki siitiichichawak? ⁴⁷ Eyey ma ye God riiti ma tawey, ye riiti majin meejito. Kwo God riiti makasakech eena kwo eeji majin meejikasakech.”

*EBRAHAM RIINA YIMOWUNAN BIISH TAR
NEDII ADA EECHABA TAR*

⁴⁸ Ju ma ye Jisas riina eecha wor: “Nota maji siikenen bato: mii eeta Sameria ma. Spirit kapasek

miitaka eecha tawa.” ⁴⁹ Jisas rii awasen eecha wor: “Kapasek spirit adaka eecha takasakech. Yahoo. Ada eeji Apoko riiti hin yesokwatawak, kwo eeji hin dagiir poyetu. ⁵⁰ Ada mayama eeji hinotii yesokwakasakech. Ma por rii tawey, riita eeji hin yesokwachi hehar siiken anaseechitu. ⁵¹ Eeta ada kwona siiken majin wocho: Ma por eeji majin sumowu taney, riipa saka eechaba eechaba hakiitawak.”

⁵² Worek, Ju ma ye eecha wor: “Nota he hamawa mii spirit kapasekeka tawa. Ebrahim rii harek, piirapet rii habar. Wowak, mii eecha wocho: “Ma por rii eeji maji hehar sumowuney, riipa saka hakiitawak. ⁵³ Iiboy mii noti wayega Ebrahim riina dagiir poyetu. Rii har. Piirapet ye habar. Mii miita mayama otiiniga namaga siiken otiito?”

⁵⁴ Worek, Jisas rii awasen eecha wor: “Ada eeji hin mayama yesokwataney, iipa kubuchey siikiita. Wowey, eeji Apoko rii eeji hin yesokwato. Wowey, kwo eecha wocho: ‘Ka noti God!’ ⁵⁵ Wowey, kwo riina hekasakech. Ada, adaba riina hecho. Ada eecha wonyey, ‘Ada riina saka hechawak’, woney, iipa ada kwota woshep-iibak tawa maga eechaba siikiita. Wowak, ada riina hehar hechawak, ada riiti majin hehar sumowutu.

⁵⁶ “Kwoti wayega Ebrahim rii eeji nediin heri, riita kwoya woy hikitar. Riita herek, ri inyaka kwoya hikir.” ⁵⁷ Worek, eena Ju ma ye eecha wor, “Mii 50 sukwiya takasakech. Eecha tawey, mii boy Ebrahim riina her?” ⁵⁸ Jisas rii awasen eecha wor: “Eeta siiken, ada kwona wocho, mashi

Ebrahim riina yimowunan biish tar nedii ad tabatar.”

⁵⁹ Worek, Ju ma ye riina papak raboken otiirek, rii veenyichi lotu akan heechi saka ir.

9

MIY KIITIIR MA RIITI NOMA

¹ Jisas rii chishi icharek, i her miy kiitiir ma poren. Heri nokwapa siita yimowurek, kiitiir.

² Jisas riiti disaipel ye riina woher: “Kapo namey kapasek boboy miy kiitiir? Kapo diita ma riiti, kapo riiti awi, eepi piiriiti kapasek boboy?”

³ Worek, Jisas rii awasen eecha wor: “Diita ma riiti kapasek boboy riiti awi eepi piiriiti kapasek boboy riiti miyin kiitiikasakech. God riiti hapaga tawa boboyen ma yechi misomak geenyik otiitaken eena riiti miy kiitii mukuchir. ⁴ Apa nedii nota na ana heechirek yar God riiti yon hapaga siichi oti ta. Apa yadii tawa. Niy sii yak otiito. Sii yanak, ma yo otiikasakech. ⁵ Ada diita nosapek tawa nedii an diita nosap haba.”

⁶ Rii eecha wochi rii sogwiyan piichi nosapeka neekijeeborechi eeta ma riiti miyik neekir.

⁷ Worek, riin eecha wor: “Miita na i Siloam pak uku yeetii.” (Diita hi dareboyechi eecha wocho, heechinak sa i.) Worek, eeta ma rii i uku yeechi yari meyimaka her.

⁸ Riiti akama ma ye mashi hecharek mani yan somak wochar ma ye wopoy paka her, “Kapo kata ma rii yiniga yan somak wochar ma?” ⁹ Ma kaw ye eecha wor, “Ayo, dii eeta ma riita.” Anadii ma ye way eecha wor: “Dii eeta ma riitaga eecha

hewa.” Worek, eeta ma rii eecha wor: “Diitata ada.”

¹⁰ Worek, ye riina woher: “Boyewak mi miy kepi sowa?” ¹¹ Worek, rii awasen eecha wor: “Diita ma riina Jisas habato riita nosapen yeechi ukukajeeborechi eeji miyin apo yichi eecha wor, ‘Miita na i Siloam paka uku yeetii poy. Eena an i uku yar. Wowak, eeji miy eeta kepi siirek ada mey maka hecho.” ¹² Worek, ye awasen eecha woher, “Eeta ma rii siitak tawa?” Rii eecha wor: “An hekasakech.”

¹³ Worek, miy kiitii tar ma riin yeechi Perisi yechak ye ir. ¹⁴ Eeta nedii Jisas rii chiren yeechi miyin apoyer nedii sii eeta akama sii tawa nedii. ¹⁵ Eena ye riina kawka woher, “Mi miy ii shecha kepi sowa?” Worek, rii yenya eecha wor: “Rii chiren yeechiniga eeji miyik apoyechuwak, ada uku yawak, eeji miyin diita mey maka hecho.” ¹⁶ Worek, Perisi akamak siitawa nedii reekito.” Worek, anadii ma ye eecha wor: “Boyega diita kapasekeka tawa ma rii boyega diita harapa yo mayakan otiito?” Worek, ma ye piikachi saniga saniga siir.

¹⁷ Worek, Perisi ye eeta ma riin kawka woher: “Diita ma rii miiti miyin otii kepi sowey, mii riin shecha wocho?” Rii awasen eecha wor: “Rii eeta piirapet.” ¹⁸ Eeta siiken, mashi diita ma rii ri kiitiitari komas rii her. Wori, Ju ma ye eena hikikasakech. Worek, eena ye miy kiitiir ma riiti awi eepi piiriina uwar. ¹⁹ Yecha piiriina woher: “Dii kapo kichi yikapwa? Ki eecha wocho, yimowur nediik miy eeka kiitiir? Eecha tawey, boyewak rii apa kata mey maka hecho?”

²⁰ Worek, awi eepi piir awasen eecha wor: “Ayo, sicha hecho sichi yikapwa. Riina yimowur nediik eechaba miy kiitii tar. ²¹ Apa riiti miy mey maka hecho wey, ii si hekasakech. Nama riiti miyin tagwawa. Ii eechaba si hekasakech. Kwota na riina wohe. Rii eeta harapa siir. Riipa kwona sawo mukuchiita!” ²² Riiti awi eepi piir Ju ma yenya akiirek, eena eecha wor. Ju ma ye geenyik eecha worek, ma por rii Jisas riina eecha wochaney, rii eeta Kraist, iipa riina lotu akak oti poyikiita. ²³ Eena awi eepi piir eecha wor: “Riina na wohe. Rii eeta harapa siir!”

²⁴ Worek, komas nedii ye miy kiitiir ma riina eecha wor: “Miita na God riiti hin yesokwa ta. No hikitu diita ma rii kapasekeka tar ma.” ²⁵ Ma rii awasen eecha wor: “Rii kapo kapasekeka tawa ma, kapo biish. An saka hechawak. Boboy podaten an hecho, mashi eeji miyin kiitiitari apa an hecho.”

²⁶ Worek, ye riina woher: “Shecha otiirek, mi miyin tagwachir?”

²⁷ Rii awasen yenya eecha wor: “Ada kwona ba hamar. Kwo meejikasakech. Boyewak, kwo kawka meejiken otiito? Kwota eechaba riiti disaipel siibaken hikitu?”

²⁸ Worek, ye riina wosoboyer. Eecha wor: “Miitaba saniga riiti disaipel. No Moses riiti disaipel.

²⁹ Nota hikitu God rii Moses riina maji har. Eeta ma rii siitak taren yar? Nota hekasakech.”

³⁰ Eeta ma rii awasen yenya eecha wor: “Diita henebarabo tawa boboy siiken. Rii eeji miyin tagwari, kwo riita heechi yar eemen hekasakech!

³¹ No hikitu God riita kapasekeka tawa ma majin

meejikasakech. Wowak, ma ye God riiti hin yesokwotawey, riina sumowutawey, rii yenza meejito. ³² Mashi mashi nedii apa nedii diita maji takasakech: Ma por miy kiitiitarin ma por rii tagwachirek her. ³³ God riita diita man heechinak yanan siiyega, rii waga diita yikadey boboyen saka waga otiiwak.”

³⁴ Ye riina awasen eecha wor: “Miiti awi sii miina kapasek boboyeka eecha yimowurek, mii kapasekeka tawa ma siir. Mii boy nona pokiiken otiito?” Ye eecha wochi riin otii poyir.

GOD RIITI SPIRITEN HE MIYIKASAKECH

³⁵ Jisas rii ma riina otii poyi majin rii meejir. Meejirek, rii yesha hechi wor: “Mii boy kapo Ma yikapwan hiki siitiichichu?” ³⁶ Ma rii awasen eecha wor: “Harapa ma, diita ma rii kapo nama? Miita ana sawonak, anapa riina hiki siitiichikiita.” ³⁷ Jisas rii eecha wor: “Mii riina her. Riina herek, miitaka apa maji bato.” ³⁸ Ma rii meejichi eecha wor: “Harapa Ma, ada hiki siitiichichu.” Worek, rii yatii bogok putiichi God riiti hin yesokwatar.

³⁹ Jisas rii eecha wor: “Ada diita nosapek yari man anasaken yar. Eena ma henyan biish tawey, yepa hekiita. Ma ye hechawey, yechi miy iipa kiitiikiita.” ⁴⁰ Worek, Perisi ma kaw ye bana tarek, ye diita majin meejir. Worek, ye eecha wor: “No eechaba miy kiitiito?” ⁴¹ Jisas rii eecha wor: “Kwoti miy kiitii tawey, kwo kapasek boboyekasakech. Wowak, kwo eecha wocho: ‘Noti miy hecho.’ Eena kwi kapasek boboy sii eechaba tawa.”

10

SIPSIP HEECHI TAWA INYI SHIYI TAWA MAJI

¹ “Ada kwona maji siikiinen bato. Ma por rii sipsip yechi inyi nuburejak iyarenan siiney, anadii nobok iyareney, rii eeta hiyiya tawa ma. ² Wowak, ma rii nuburejak iyare tawey, rii eeta sipsipen siitii kowu tawa ma. ³ Nubureja tagwachichawa ma rii nuburejan diita man tagwachichu. Wowak, eeta sipsip ye riiti ayan meejito. Rii riiti sipsip siiken yechi hin uwato. Rii yenya yeechi geenyik ye ichu. ⁴ Geeniyik ye ichawak, rii mapo tawak, riiti sipsip ye riiti ayan meejichi sumowutu. ⁵ Ye akar man sumowukasakech. Yaho. Ye heechi aka ichu. Ye anadii ma yechi ayan meejikasakech. Eena akii ichu.” ⁶ Jisas rii diita shiyi tawa majin bari, ye eeta maji mun hehar meejikasakech.

JISAS RII SIPSIP YENYA SIITII KOWU TAWA MA KEPI

⁷ Worek, Jisas rii riina eecha wor: “Eeta siiken, ada kwona wocho ada eeta sipsip yechi nubureja. ⁸ Eyey ma ye mashi kwotak yari, ye eeta hiyiya tawa ma. Wowak, eeta sipsip ye yechi ayan meejikasakech. ⁹ Ada eeta nubureja. Ma por rii adak yanak nuburejak iyareney, God riipa riina awasen yakiita. Riipa iyaretanak, yasayatanak, iyeyatanak, aboboy atakiita.

¹⁰ “Hiyiya tawa ma rii sipsipen hiyik yatanak, sowakwoken, kapasekeban otiiken eena yato. Ada yatawey, ma yecha hehar tanak, God riiti boboy kepi takiikiisiiken eena ada yar. ¹¹ Ada sipsipen siitii kowu tawa ma rii sipsipen yenya

hachiken eena sayareto. ¹² Ma ya yon oti tawey, rii sipsipen siitii kowu tawa ma siikenekasakech. Riiti sipsipekasakech. Kwashik tawa asa yaney, riipa hechi akii ikiita. Wonyak, kwashika tawa asa ya sipsip yenya kikirechishinak, yepa heechi akii iyeyakiita. ¹³ Diita ma rii ya yoban otiitawak, sipsip yen hehar hekasakech.

¹⁴ “Ada sipsipen siitii kowu tawa ma kepi. Ada eeji sipsipen hechawak, eeta sipsip ye way ana hecho. ¹⁵ Ana Apoko riita hechawabaga, ada eeji sipsipen hikitu, yecha ana hikitu. Ada eeta sipsip yenya hachik otiito. ¹⁶ Eeji akar sipsip kaw tawey, ye diita inyik takasakech. Anapa yenya yayabakiita. Yepa eeji ayan meejikiita. Wonyak, yepa podateba sipsipek siinak, siiti kowu tawa ma podareba siikiita.

¹⁷ “Ada eeji sipsipen hachiken otiitawak, an komas saniyeechi kawka yakiita. Eena ana Apoko riita rukusiito. ¹⁸ Ma por rii ana otiichinyak, hakasakech. Adaba saniga hikitu ada keena heechinak ma ye pi sowakwokiita. Ana otiichinyak ha hapaga boboyeka aneecha tawa. Diita maji eeji Apoko riita ada eecha otiiken har.”

¹⁹ Ju ma ye diita majin meejirek, piikachi saniga saniga hikitar. ²⁰ Nokwapa nokwapa ma eecha wochar, “Kapasek spirit riitaka eecha tawak, rii beyito. Boyewak kwota riiti maji meejito?”

²¹ Wowak, ma kaw ye eecha wochar, “Dii spirit kapasek tawa ma riiti majikasakech. Boyega kapasek spiriteka tawey, rii miy dumu tawa man tagwachichu?”

JU MA YE JISAS RIINA WOSOWOYER

²² Noku sha atawa nedii pochik Jerusaem akamak niikiir yar nedii sokwar. Nokusha atawa nedii siiti hi Derikeshan. ²³ Jisas rii harapa lotu akak Solomon riiti aka cheyek chishitar. ²⁴ Eeka tarek, Ju ma ye ya riina ya cheshenechi siitiir. Siitiirek, eeche woher, “Kapo yadii shasha miipa heechinak, noti inyakapa hikitawak no miina kowutu. Mii nona na geenyik ba. Mii kapo Kraist?”

²⁵ Worek, Jisas rii yenya awasen eeche wor: “Ada kwona maji ba hamari, kwo eena hikikasakech. Eyey yon ada eeji Apoko riiti hik otiitawey, ii eeta eeji hin yesokwato. ²⁶ Kwota eeji sipsipekasakech eena kwo ana hiki siitiichikasakech. ²⁷ Eeji sipsip ye eeji ayan meejitawak, ye ana sumowutawak, ada yenya hecho. ²⁸ Ada yenya eecheba eecheba takiitawa boboyen hanak, yepa saka hakiitawak. Yaho. Ma por sakapa eeji tapak tanan yakiitawak. ²⁹ Eeji Apoko rii yenya ana har. Rii hapaga bor tawak, eyey boboyen dagiir poyirek, ma por rii Apoko riiti tapak tanan yakasakech. ³⁰ Adaka Apoko riitaka shi shichiba.”

³¹ Worek, Ju ma ye papan yeechi riina raboken otiir. ³² Otiirek, Jisas rii yenya eeche wor: “Ada kwona Apokoriiti nokwapa nokwapa yo kepin mukuchir. Ada boy mey yon otiirin kwo ana papak raboken otiito?”

³³ Ju ma ye awasen eeche wor: “Miita yo kepin otiirin, nota eena miina papa rabokasakech. Miita God riiti hin wosoboyeto. Miita sobo ma tawey mii eeche wocho ada eeta God!”

³⁴ Jisas riï awasen eecha wor: “Kwoti jeyek tawa lok God riï eecha wocho: ‘Kwo godega eecha tawa.’ ³⁵ No hikitu eeta keyi tawa maji siipa siiken eechaba eechaba siikiita. Wowak, God riiti majin har ma yenya God riï goden habatar. ³⁶ Wowak, Apoko riita ana hisiichi heechirek, an diita nosapek yar. Eena ada eecha wocho, ‘Ada God riiti Yikapwa.’ Kwo boyewak eecha wocho, ‘Mii God riina wohega maji bato?’

³⁷ “Ada eeji Apoko riiti yon otiinan siiyega, kwo eeji majin opoche hiki siitiichichanakech.

³⁸ Wowak, ada riiti yon otiito. Kwota eeji majin hiki siitiichinyan yuyaney, ii na ada otii tawa yon hiki siitiichi. Kwo eecha otiiney, kwopa hehar hekiita: Apoko riï adaka tawak, an riitaka tawa.”

³⁹ Worek, ye riina poko jiken otiitari, riï yenya taviiyichi heechi ir.

⁴⁰ Worek, Jisas riï heechi i Jodan pa giireba yepak ir. Iri, Jon riita man uku yeechi tar eemek iyarechi eeka siir. ⁴¹ Siirek, nokwapa nokwapa ma mima ye riitak yar. Yari, ye eecha wor: “Jon riï mirakel pochi otiikasakech. Wowak, eyey boboyen diita ma riina bari, eeta siiken.”

⁴² Worek, eeta em nokwapa nokwapa ma ye riina hiki siitiichichar.

11

LASARAS RIITA HAR NOMA

¹ Ma por haken otiitari, riiti hi Lasaras, Betani akamak tar ma. Betani eeta Maria Mata piiriiti akama. Maria sii Mata siiti kumwoy. ² Diita Maria sii mashi kwowa ya tawa ukun yeechi ye i Harapa Ma riiti masekiik gwotiichi kaw riiti yatiik bachir.

Siiti medaya, Lasaras, rii haken otiitar. ³ Eena mowey piir Jisas riina maji wochirek ir. Iri, eecha wor: “Harapa Ma, miiti rukusii tar apoma rii haken otiito.” ⁴ Worek, Jisas rii meejiichi eecha wor: “Eeta yikadey hak otii tawa boboy sii ma hakasakech. Eeta hak otii tawa boboy sii God riiti hin yesokwaken eena yar. God riiti Yikapwa riiti hin yesokwaken eena yar.”

⁵ Jisas rii Mata siina, siiti kumwoy, Maria siina, Lasaras riitaka yenya rukusiitar. ⁶ Jisas rii Lasaras riita haken otiitar majin meejiichi rii yadii upurus riita tar eemek kawka tar. ⁷ Worek, rii riiti disaipel yenya eecha wor: “Kwo napa heechi Judia nosapek i.”

⁸ Worek, disaipel ye awasen eecha wor: “Tisa, mashi Ju ma ye miina papak raboken otiiri. Mii boy eeta eemek kawka iku?”

⁹ Jisas rii eecha wor: “Kwo kapo eecha hikitu? Apa yadii podat 12 awa tawa. Ma yadiik chishi taney, rii saka sowakwoksakech. Rii diita nosap yaman hechi eeka chishitu. ¹⁰ Ma rii niyik chishitaney, riipa saka sowakwokiita. Haba riitaka eecha takasakech eena saka sowakwokiita.”

¹¹ Jisas rii eecha wochi kawka eecha wor: “Noti nareboy Lasaras rii wato. Rii watawey, ada i riina chey yesokwa yichikiita.” ¹² Disaipel ye eecha wor: “Harapa Ma, riita wataney, riipa kepi siikiita.” ¹³ Jisas rii hikir Lasaras rii eeta kiiriidiichir. ¹⁴ Eena Jisas rii yenya geenyik kwodiiwor: “Lasaras rii ha hamar. ¹⁵ An saka riitaka eecha tarek, kwoti hin ada hikitawak, eena ada kwoya hikitu. Kwopa henyak, kwopa hiki siitiichikiita. Eena ada kwoya hikitu. No hawa riitaka ik.”

¹⁶ Tomas habatari, Didimas, rii eecha wor: “Na hawa i. Riitaka eecha habak!”

*JISAS RII EETA YESOKWA YICHINAK, EECH-
ABA EECHABA TAKIITAWA BOBOY*

¹⁷ Jisas rii i yarerek, rii i meejir, Lasaras rii tiiriimo supuk yadii dupura kapiira siir. ¹⁸ Betani Jerusalemeka bana bana tar. Mail upurus tar. ¹⁹ Piiriiti medaya harek, eena nokwapa nokwapa Ju ma ye ya Maria Mata piiriiti inyakan saboyeken eena yar. ²⁰ Mata sii Jisas riita ya majin meejirek, sii riina nobok jawoken eena ir. Worek, Maria sii akak yichar.

²¹ Mata sii jawochi riina eecha wor: “Harapa Ma, miita diika teyega siichi medaya rii waga saka hawak. ²² Apak ada hikitu miita God riina wohenya boboy riipa miina hakiita.”

²³ Worek, Jisas rii awasen eecha wor: “Na medaya riina awasen yesokwakiita.” ²⁴ Mata sii riina awasen eecha wor: “An hikitu riipa hamak tawa nedii eyey ma mima awasen saniye-eechi yesokwana nedii rii sokwabakiita.” ²⁵ Jisas rii awasen eecha wor: “Yeechi otii saniye-eechi yesokwa tawa ma diita ada. Echaba takiitawa boboy diita ada. Ma rii ana hiki siitiichichaney, riipa haney, rii eechaba eechaba takiita. ²⁶ Ma rii tawak, ana hiki siitiichichaney, riipa hakasakech. Ni boy diina hiki siitiichichu?” ²⁷ Sii awasen eecha wor: “Harapa Ma, ayo. Ada hiki siitiichichu mii eeta Kraist, God riiti Yikapwa. Mii God riita nona mashi wotarek, yakiitawa ma.”

JISAS RII KEYAR

²⁸ Mata sii eecha worek, sii heechi awasen i siiti kumwoy siina veenyichi sawor. Sii siina eecha wor: “Rii nija yaken wohecho.” ²⁹ Maria sii eena meejichi sokwa ameya ir. ³⁰ Jisas rii akama saka iyare tarek. Rii Mata siita riina i her eemebak eeka tar. ³¹ Sii sokwa irek, eeta akak tar ma ye Maria siina saboyetar ma ye siina hechi sokwa geenyik iyarer. Ye eecha hikir sii tiiriimo supuk yi keyataken ichu.

³² Maria sii Jisas riita tar eemek iyar riina hechi sii riiti yatii jemuk yatii bogok putiichi riina maji eecha wor: “Harapa Ma, miita diika ya teyega, eeji medaya rii waga saka waga harek.”

³³ Jisas rii her sii keyatarek, siitaka ir Ju ma ye keyabatarek, her. Worek, rii inyakapwa hik-itarek bii nomuyatar. ³⁴ Nomuyatarek, rii eecha wor: “Kwo siitak seechuwa?” Ye riina eecha wor: “Harapa Ma, na ya her.”

³⁵ Worek, Jisas rii keyar. ³⁶ Eena Ju ma yecha eecha wor: “Na he. Rii riina harapa rukusiitar.”

³⁷ Worek, ma kaw ye eecha wor: “Diita ma rii kiitii tawa miyin tagwa tawa ma. Rii boy saka Lasaras riita hak otiirin neeki dagiirerek siirek?”

JISAS RIITA LASARAS RIINA OTII SANIYAR

³⁸ Jisas rii kawka bii nomuyarek rii tiiriimok ir. Eeta tiiriimo supu papa hen kwotiir. Akar papa taken dasiipii paretar. ³⁹ Worek, Jisas rii eecha wor: “Kwota na tadii tawa papan tagwa.” Mata, har ma riiti mowey, sii eecha wor: “Harapa Ma rii hari, yadii dupura kapiira siir. Eena kwopa yato.” ⁴⁰ Jisas rii siina eecha wor: “Ada boy mashi ninya saka worek, nija hikisiitiichiyega ni waga

God riiti boboy kepin hewa?” ⁴¹ Worek, ye papan tagwar.

Jisas rii neren mo hechi rii eecha wor: “Apoko ada woshi awey mii meejuwa. ⁴² Ada hechi, eechaba eechaba nedii ada miina wohechawey mii meejito. Ada diita ma yecha ya siitii ye i taweyn eena ada eecha wocho. Ye henyak, yepa hiki siitiichikiita, miita ana heechirek yar.”

⁴³ Eecha wochi rii uwar: “Lasaras, na ya saya!”

⁴⁴ Worek, har ma rii sokwachi ya sayar. Ri yatii tapa siivatabik jichar. Misoma siivatabibak gamutar. Worek, Jisas rii eecha wor: “Rina na heemachinyak, sa sokwa i.”

JU HARAPA MA YE JISAS RIINA PI SOWAKWO MAJIN BAR

⁴⁵ Nokwapa nokwapa Maria siina heken yar Ju ma ye Jisas riita otiir boboyen heri, ye eena riina hiki siitiichir. ⁴⁶ Wowak, kaw ye heechi i Perisi ma yenya Jisas riita otiir boboyen sawo mukuchir.

⁴⁷ Worek, eena Ju opelen otiitar harapa ma ye, Perisi ma ye kaunsil ma yen woyayeechi yenya eecha wor: “Nopa kapo shecha otiikiita? Diita ma rii nokwapa mirakelen otiito! ⁴⁸ Nota riina heechinak, riita eechaba otiitaney, eyey ma mima yepa riitaban hiki siitiichikiita. Rom ma harapa ma ye yanak, ye noti harapa lotu akan noti akaman kapasek otiikiita.”

⁴⁹ Worek, yechaka tar ma por, riiti hi Kaiapas, rii opelen mapo otiitar harapa ma, rii eecha wor: “Kwo sobo hikitu. ⁵⁰ Kwo boy eecha hikitu ma por riitaba ma miman hachiney, eeta kepi. Eyey Ju ma ye ha hamaney, eeta kapasek.”

⁵¹ Riita bari, riiti inyakak saniga bakasakech. Yaho. Eeta sukwiya pochi rii opelen otii harapa ma tar. Eecha tarek, rii komas yak tawa boboyen eena wor. Eecha wor Jisas rii Ju ma yenya waga hachuwa. ⁵² Jisas rii waga Ju ma mima yechaban saka waga hachuwak. God riiti yikapwa ye eyey diita nosapek ta yey taweyn, yaya podabak yopo yichiken eena waga hawa.

⁵³ Worek, eeta nediik Ju harapa ma ye Jisas riina sowakwo majin tasiir. ⁵⁴ Eena Jisas rii Juda nosapek geenyik chishikasakech. Rii eeta eemen heechi me biish tar eemek ir. Eeta akama sii hi Epraim. Rii eeta akamak riiti disaipel yechaka eecha tar.

⁵⁵ Ju ma yechi Pasova noku sha a nedii bana siir. Eena nokwapa nokwapa akaman heechi iri Jerusalem akamak ir. Maban uku yeetii tawa abon otiiken eena ir. ⁵⁶ Worek, ye eena Jisas riina yesha heken otiir. Ye harapa lotu akak iyar yopo wuchi siitii maji batar. Ye eecha wor: “Kwo shecha hikitu? Riipa kapo saka noku sha a nedii yakiitawak?” ⁵⁷ Opelen otii tar harapa ma yechaka Perisi yechaka yenya wo sawor: “Kwota ma por Jisas riina hechaney, ii napa ya nona wo.” Ye Jisas riina poko jiken gegiyatarek, eena wor.

12

MARIA SII KWOWA YATAR UKUN YEECHI JISAS RIITI YATIIK GWOTIIR

¹ Yadii 6 tarek, nokusha a nedii saka yatarek, Jisas rii Betani akamak iyarer. Eeta akama Lasaras riiti akama, Jisas riita tiiriimo supuk taren otii saniyeechi yesokwar ma, riiti akama.

² Yecha Jisas riina eeka aboboy oti ar. Mata siita aboboy gwotiitarek, Lasaras rii ma yechaka yichar. ³ Worek, Maria sii yan najitar kwowa yatar uku kepin yeechi yaya Jisas riiti yatiik gwotiichi kaw siiti masebiyak bachir. Worek, eeta uku si kwowa eeta akamak sokwa punyir. ⁴ Worek, Jisas rriti disaipel ma por, ri hi, Judas Iskeriot, rii komas Jisas riina yabu pichar ma yenya mukuchir ma, rii eecha wor: ⁵ “Boyewak no diita kwowa yatawa ukun saka 300 yak tokochi kiiriisiiposii tawa ma yenya hawak?” ⁶ Rii saka eeta kiiriisiiposii tawa ma yenya hikichi eecha wor. Yahoo. Rii hiyi bak tar ma. Rii yan heechitar bokisen siitii kowu tarek, hiyik yatar ma.

⁷ Worek, Jisas rii yenya eecha wor: “Na heechi eeta mima siin. Sii eena neekitaney, i ana tiiriimok chikiita. ⁸ Kiiriisiiposii tawa ma ye kwotaka eechaba takiita. Wowak, ada kwotaka eechaba takasakech.”

OPELEN OTIITAR HARAPA MA YE LASARAS RIINA PI SOWAKWO HAKEN HIKITAR

⁹ Nokwapa nokwapa Ju ma mima ye meejiiri Jisas rii Betani akamak tar. Worek, ye eena eeka ichar. Ye ya Jisas riitaban hekasakech. Lasaras riina hebaken eena yatar. Mashi Jisas riita riina tiiriimok oti saniyeechi yesokwarek, eena hek yar. ¹⁰ Eena opelen otiitar harapa ma ye Lasaras riina pi sowakwobaken hikitar. ¹¹ Nokwapa nokwapa Ju ma ye Lasaras riina hechi opelen otiitar harapa ma yen yu yeechi heechi yari, Jisas riitaban hikisiitiichichar. Ye eena hikitar.

*JISAS RII AKA TABO YIMAGA HE JERUSALEM
IYARER*

¹² Komas yadii pochi nediik nokwapa nokwapa ma mima ye noku sha aken yari, ye meejir Jisas riita Jerusalemek ya maji meejir. ¹³ Worek, ye eena me tapan rrekiichi neeki i nobok jawor. Jawochi ye uwar:

“Hasana!

Diita ma rii God rii hik yatawey,
riiti hiban na yesokwa ta.

Rii eeta Isrel yechi aka tabo yima!”

¹⁴ Worek, Jisas rii donki yesha he yeechi eeka yo yirek ir. Keyir maji eeche wor:

¹⁵ “Saion akama kwo opoche akiitanakech.

Na he! Kwi aka tabo yima rii diita yato.

Rii donki magiirek yo yi yato.”

¹⁶ Eeta nediik disaipel ye diita majin hikikasakech. Wowak, komas Jisas rii riiti hadabas boboy kepin yar nediik ye eeka hikir diita jek keyir majin. Ye hikibar eeta ma yecha riina otiir boboyen.

¹⁷ Eeta nediik Jisas rii Lasaras riita harek tiiri-imo supuk tarin uwa yesokwa yichiri ma mima ye eena hechi otiir boboyen ba ye itar. ¹⁸ Eeta ma mima ye eeta mirakel otiirin meejiichi ye eena i riina nobok jawor. ¹⁹ Worek, eena Perisi ye yech-aba awasen awasen batar: “Na he! Nota keena kata boboyen otiiniga dagiir poyekasakech. Eyey ma mima ye iri riitaban sumowutu!”

GRIK MA KAW YE JISAS RIINA HEKEN WOR

²⁰ Ma mima ye Jerusalem akamak irek, Grik ma kaw ye God riiti hin yesokwataken ibabar. ²¹ Irek, ye Pilip riitaka yar. Pilip ri akama Betsaida Galili

nosapek tar ma. Riitaka yari, ye riina eecha wor: “Miinawa, nota Jisas riina heken gegiyato.”
²² Worek, Pilip rii i Endru riitaka Pilip riitaka piir eecha i Jisas riina wor. ²³ Worek, Jisas rii awasen eecha wor: “Eeta nedii ya hamawa. Apa Ma Yikapwa rii hadabas boboy kepin yak otiito. ²⁴ Ada kwona maji siikenen wocho: wit siikii nosapek sakachi sokwa siichi hanan siiney, riipa saniga takiita. Wowak, siita sakachi haney, iipa sii sokwachi harapa siiken wakiita. ²⁵ Ma rii riiti mesek mayama rukusii tawey, riipa sii siiken siikiita. Wowak, ma rii riiti maban diita nosapek tanak yuyaney, iipa ri maban neekichi eechaba eechaba takiita. ²⁶ Ma por riita eeji yon neekitaney, rii sapa ana sumowu ta. Eecha otiitaney, eeji yo oti wakasa ma riipa ya ada tawa akamabak adaka tabatakiita. Ma por rii eeji yon otiitaney, eeji Apoko riipa riiti hin howuk heechikiita.

EYEEY MA YE SA MA YIKAPWA RIITI HIN YESOKWA TA

²⁷ “Apa eeji bii negiirabotawak, an nubunubutu. Anapa shecha wokiita? Anapa kapo eecha wok, ‘Apoko, mii kapo adak yak otiawa boboyen na yeechi rabo? Yaho. Anapa saka eecha wokiitawak. Eeta yikadey nomu yatawa boboyen kiyaken yar. ²⁸ Apoko! Miita miiti hin ma yechi misomak otiisa kepi wey sii!” Worek, howuk ya sakar aya eecha wor: “Ada eeji hin oti harapa siir. Apa ada kawka otiiniga harapa mayaka siikiita.” ²⁹ Ma mima ye bana bana siitiitarek, meejirin ye eecha wor: “Nerek

kurutu.” Kaw ye eecha wor: “Ejel por riita riina maji bato.”

³⁰ Jisas rii awasen eecha wor: “Diita maji sokwari, sii an kiyatayekasakech. Yaho. Sii sokwari kwona kiyatayechiken eena sokwar. ³¹ Apa diita nosapek tawa ma mima yenya anasaken otiit. Apa diita nosapek aka tabo yichawa man dagiir poyeken otiito. ³² Ana nosapek tawan yesokwanak, eeta nediik ada ma mima yenya yeechi yayakiita.” ³³ Rii eecha wori riita hakiitawa majin eena wor.

³⁴ Worek, eeta ma mima ye awasen eecha wor: “Noti lo nona eecha wocho: Kraist riipa eechaba eechaba takiita. Boyewak mii eecha wocho, ‘Ma Yikapwa riina yesokwakiita?’ Diita Ma Yikapwa rii na ma?”

³⁵ Worek, Jisas rii yenya eecha wor: “Ameda siinak haba siipa kwotaka eecha takiita. Apa kwo habaka tawa. Eena kwota na habak chishi ta. Iipa niyiki ya kwona gamukiita. Ma niyikiyik chishitaney, rii i eemen hekasakech. ³⁶ Kwo habak tawey, eena na hiki siitiichicha. Iipa kwo haba yikapwa siikiita.”

NOKWAPA NOKWAPA JU MA JISAS RIINA HIKI SIITIICHIKASAKECH

Jisas rii yenya diita maji bachi rii yechi misomak heechi i veenyir. ³⁷ Yeherek, rii nokwapa nokwapa mirakelen yechi misomak otiiri, ye eena hiki siitiichikasakech. ³⁸ Eena piirapet Aisaia riiti maji sii siiken sokwar. Rii eecha wor:

“Harapa Ma, nama kapo noti majin hiki siitiichir?”

Naman kapo Harapa Ma riiti hapaga tawa boboyen mukuchir?”

³⁹ Ye kiki siichi hiki siitiichikasakech. Eena Aisaia rii eecha wor:

“God rii yechi miyin otii dumur,
Worek, yi inyaka sii papaga siir.

⁴⁰ Eena yechi miy hekasakech, marenoku hikikasakech.

Yechi inyaka wopu dareboyekasakech eena ada yenya otii kepi siichikasakech.”

⁴¹ Aisaia rii Jisas riiti hadabas boboyen hechi eena eecha wor.

⁴² Worek, nokwapa nokwapa Ju yechi harapa ma ye Jisas riina hiki siitiichir. Worek, ye Perisi ma yenya akiitarek, eena ye hiki siitiichichari geenyik kwodii wokusakech. Ye eecha hikir: “Iipa ye nona lotu akak nonapa otii poyekiita.”

⁴³ Ye God riiti yenya yechi hin yesokwanan yuyatar. Ye ma yecha yechi hin yesokwataken eena gegiyatar.

JISAS RIITI MAJI SIIPA EYEE MA YENYA ANASAKIITA

⁴⁴ Jisas rii harapa uwachi eecha wor: “Ma ye ana hiki siitiichichaney, ii kwo saka adaban hiki siitiichichawak, rii ana heechirek yar Apoko riina hiki siitiichibato. ⁴⁵ Eeta ma ye ana hechawey, ye ana heechirek yar P Apoko riina hebato. ⁴⁶ Ada diita nosapek yari, habaga eecha yar. Eyey ma ye ana hiki siitiichinyak yepa

niyik takasakech. ⁴⁷ Eeta ma ye eeji maji mee-
jichi nasowoy taney, ada yenya anasakasakech.
Ada saka anasak yarek. Ada ma mima yenya
yesokwa yichiken eena yar. ⁴⁸ Eeta ma rii ana
wosowoyeney, eeji majin yanan siiney, riina
anasakiita. Ada sawotar maji sii hamak tawa
nediik riina anasakiita.” ⁴⁹ Ada batawa maji
saka eeji inyakak hikichi batawak. Yaho. Ana
heechirek yar Apoko rii ada sawoken wochirek
yar majin ana har. ⁵⁰ Wowak, apa ada hecho riiti
maji sii man eechaba eechaba takiitawa boboyen
hato. Eena eyey majin ada batawey, eeji Apoko
riita har majiga ada eechaba bato.”

13

JISAS RII RIITI DISAIPEL YECHI YATIIN UKU YEETIICHIR

¹ Mashi yadii podat Pasova nokusha a nedii
tarek, Jisas rii hikitar rii diita nosapen heechi
Apoko riitak awasen ikiita. Jisas rii diita nosapek
tawa ma mima riitin rii rukusiitari, i i eeta riitaka
hamak tawa nedii rii rukusiibatar.

² Hogo nedii ye atar. Gaba rii hiki hamar:
Judas Iskeriot, Saimon riiti yikapwa, rii Jisas riina
ye i yabu pi ma yechi tapak howur har. ³ Jisas
rii her eeta Apoko rii eyey hapaga boboy Jisas
riina ha hamar. Rii her rii God riita heechirek,
yari riipa awasen riitak ikiita. ⁴ Eena Jisas rii
aboboy heechi sokwa riiti saket kwoyaveechi si-
ivatabin yeechi giiriir. ⁵ Giiriichi, rii ukun yeechi
heebiyaken gwotiipakachi riiti disaipel yeechi
yatiin yeetiichi riita nedii poko giiretar siivatabin
yeechi yechi yatiin bachir. ⁶ Eecha otiirek, rii

Saimon Pita riitak yar. Yarek, Pita rii eecha wor: “Harapa Ma, mii boy eeji yatiin yeetiibaken yato?”

⁷ Worek, Jisas rii awasen eecha wor: “Ada otii tawa boboy mii hekasakech. Kommas miipa hekiita.”

⁸ Pita rii eecha wor: “Miipa yatii eejin sakapa yeetiichi tawak. Eeta sii siiken!” Worek, Jisas rii awasen eecha wor: “Ada miina yeechinan siiney, eeji eyey boboyen mii yakasakech.” ⁹ Worek, Saimon Pita rii awasen wor: “Harapa Ma mii eeji yatiiban yeechikasakech. Tapa masek napa yeechiba!”

¹⁰ Jisas rii awasen eecha wor: “Ma rii riiti eyey maban uku yeetii hamaney, rii kawka riiti maban uku yeetiikasakech. Yatiiban yeetiiney, siipa eeta apama hekiita. Kwo eeta apama hecho. Wowak, podareba rii apama hekasakech.” ¹¹ Jisas rii her eeta ma riipa riina yabu pi man yaya mukuchikiita. Eena rii eecha wor: “Kwo eyey apama hekasakech.”

¹² Worek, Jisas rii yechi yatiin uku yeechi hamarek, rii riiti saketen ruwuchi kawka yir. Rii yen eecha wor: “Kwo kapo ada kwona otiwa boboyen hikitu?” ¹³ Kwota ana Tisa, Harapa Ma habato. Eeta kepi kwota eecha wochawey, ada eechaba tawa. ¹⁴ Ada Harapa. Ada Tisa. Tawak, ada kwoti yatiin yeechiwa. Wowak, kwo na eechaba kwoti yak kumwoy, yechi yatiin yeechiba ta. ¹⁵ Otii tawa abo kepin ada kwona mukuchuwa. Ada kwona otiichirega kwo napa eechaba otii ta. ¹⁶ Ada kwona maji siikenen bato: Yo otii tawa wakasa ma rii riiti harapa man ichawa ma

rii riiti yon wochitawak ichawa ma riin dagiir poyekasakech. ¹⁷ Apa kwo diita majin hecho. Wowak, kwo i otiiney, kwo kwoya hikitakiita.

¹⁸ “Ada kwona eyey wokasakech. Ada hisiir ma yenya ada hikitu. Wowak, mashi keyir maji sii diita siiken sokwato. Sii eeche wor:

‘Ma rii eeji geyen atari, ii rii riiti yatiin yesokwachi ana piken otiir.’

¹⁹ Ada apa kwona komas sokwakiitawa majin wocho. Komasa ada wochawa sokwanak, kwopa hiki siitiichikiita ada diita Ma siiken. ²⁰ Ada kwona maji siiken wocho: Eeta ma rii ada heechinak ikiitawa ma riin yeechi hehar taney, rii ana yeechi eecheba heharetakiita. Eeta ma rii ana yaney, riipa ana heechirek yar Apoko riina yabakiita.”

JUDAS RII JISAS RIINA YEECHI YABU PI MA YEECHI TAPAK HOWU HAKIITA

²¹ Jisas rii eeche worek, riita harapa inyakapwa hikichi rii eeche wor: “Ada kwona siiken wocho: Ma por rii kwoti nediik tawey, riipa ana yabu pi ma yechi tapak howu hakiita.” ²² Rii eeche worek, riiti disaipel ye miyibak mey maka her. Ye hikikasakech. Ye eeche hikir kapo naman wocho.

²³ Disaipel poren Jisas rii he hechitari, rii Jisas riitaka bana bana tar. ²⁴ Worek, Saimon Pita rii riin ri masekiik yeyadiichi eeche wor: “Riina na woher? Rii kapo naman wocho?” ²⁵ Worek, disaipel rii Jisas riitak i bana bana maji woher: “Harapa Ma, ii mii naman wocho?” ²⁶ Worek, Jisas rii awasen maji wor: “Ada gey kawen poyekuk heechi eeta ma riina hak.” Worek, Jisas

rii gey kawen yeechi poyekuk woyichi Judas, Saimon Iskeriot riiti yikapwa, riina har.

²⁷ Worek, Judas rii diita aboboyen yarek, Gaba rii riiti sugu wopuk iyarer. Worek, Jisas rii riina eecha wor: “Miita otiiken otiina boboy na ameya otii!” ²⁸ Ma ye Jisas riitaka tiikiirek yichari ye Jisas riita bar maji meejikasakech. ²⁹ Judas rii ya mani woyi tar kwowun heharer. Eena disaipel ye kaw eecha hikir Jisas rii wochirek, Judas rii aboboy tokoken ir. Kaw eecha hikir rii wochirek, kiiriisiiposii ma kawen boboy kiyatayeken ir. ³⁰ Judas rii gey kawen yeechi rii sokwa geenyik iyarer. Eeta niy nedii.

AKAR LO MAJI

³¹ Judas rii geenyik iyarerek, Jisas rii eecha wor: “Apa Ma Yikapwa riiti hadabas boboy sii geenyik sokwakiita. ³² God riita riiti hadabas boboyen Jisas Kraist riitaka mukuchinyey, God riitaba Ma Yikapwa riiti hadabas boboyen geenyik kwodii wo ameya mukuchikiita. ³³ Eeji yikapwa an sakapa kwotaka harapa takiitawak. Wonyak, kwopa ana komas yeshakiita. Ada Ju ma yenya kwodii worega ada kwona eechaba kwodii wochi: Ada inya eem kwo yabakasakech. ³⁴ Ada kwona akar lon hato. Kwota na yaka kumwoy yenya awasen awasen rukusii ta. ³⁵ Kwota anadii man rukusiitawey, eyey ma yecha eena henyak, hikikiita two eeta eeji disaipel.”

JISAS RII EECHA WOR PITA RIITA ANA MAGI-IRECHIKIITA

³⁶ Pita rii eecha wor: “Harapa Ma, mii sitak ichu?” Jisas rii awasen eecha wor: “Ada

apak ichawa eemen mii ana sumowukasakech. Wowak, komas mii ana sumowukiita.” ³⁷ Pita rii awasen eecha wor: “Harapa Ma, boyewak apa adapa miina saka sumowukiitawak? Ada miina sayarechichu. Ada miina hachikiita.”

³⁸ Jisas rii awasen eecha wor: “Mii boy sayarechichawey mii ana hachikiita? Ada miina siiken wocho: Apochok wonyan biish tana nediiik miipa eeji hin piiriichar nedii veenyekiita.”

14

APOKO RIITAK ICHAWA NOBO EETA JISAS

¹ “Kwoti inyaka opoche i hiki ya hikitanakech. Kwo God riina hiki siitiichichawey, ana na eechema hiki siitiichicha. ² Eeji Apoko riiti aka wo nokwapa nokwapa tawa. Eecha tanan siiyega, ada mashi waga kwona wowa. Ada ichawey, kwoti eemen sayarechiken ichu. ³ Ada kwoti akaman hamanak, ada kawka ya kwona yeechi ye i adaka eecha takiita. Eena ada tawa akama kwopa eechema ya adaka tabatakiita. ⁴ Ada ichawa akama nobo kwo hecho.”

⁵ Tomas rii eecha wor: “Harapa Ma, mii siitak ichu? Eeta nobon no hekasakech. Boyega no eeta nobon hekiita?”

⁶ Jisas rii yenya eecha wor: “Ada eeta nobo. Ada omutiik boboy mu. Ada eechema eechema takiitawa boboy mu. Ma por Apoko riitak saniga i nobokasakech. Yaho. Diita adaba. ⁷ Kwota ana hechayega, ii kwo waga eeji Apoko riina hebawa. Apa kwota riina hikichi her.”

⁸ Pilip rii eecha wor: “Harapa Ma, miita na nona Apoko riina mukuchi. Wonyak, nopa eeka kiki siikiita.”

⁹ Jisas rii riina eecha wor: “Pilip ada kwotaka mashi harapa nedii tarek, mii boy ana saka hecharek? Ma ana henyey, rii eeta Apoko riina hebato. Boyewak mii eecha wocho, ‘Apokoriina na nona mukuchi?’ ¹⁰ Kapo mii ana hiki siitiichikasakech ada Apoko riitaka eecha tawak, riita adaka eecha tawa. Ada kwona batawa maji ansaka eeji inyakak hikichi batawak. Apoko rii adaka tawak, rii riiti yon otiichichu. ¹¹ Kwota na diita majin hiki siitiichicha Apoko rii adaka tawak, an riitaka tawa. Kwo ana hikiran siiney, ii napa ada otii tawa yon hechi napa ana hiki siitiichi.

¹² “Ada maji siikenen bato: ma rii ana hiki siitiichinyey, eyey ada otii tawa yikadey yon riipa otiibatakiita. Kommas riipa otiina yo siipa harapa mayaka siinak, ada otii tawa yon daggiir poyekiita. Ada Apoko riitak ikiita. Eena eecha otiitakiita. ¹³ Eyey boboyen kwota eeji hik wohenyey, ii anapa otiichikiita. Eecha otiinak, Apoko riiti hadabas boboy siipa Yikapwa riiti hik geenyek kwodii wo mukuchikiita. ¹⁴ Kwota eeji hik boy boboyen ana wohenyey anapa otiichikiita.

JISAS RII WOR! HOLI SPIRITEN HEECHINAK YAKEN EENA WOR

¹⁵ “Kwota ana rukusiitaney, iipa kwo eeji lon sumowubatakiita. ¹⁶ Anapa eeji Apoko riina wohenyak, riipa kwona anadii kiyatay tawa boboy pochin kwona habakiita. Hanak, riipa

kwotaka eechaba eechaba takiita. Dii eeta omu-tiik Spirit. ¹⁷ Diita nosapek tawa ma mima ye kiki siichi yakasakech. Ye riina hekasakech, hikikasakech. Wowak, kwo riina hecho. Rii kwotaka tawa. Kwoti inyaka woka tawa.

¹⁸ “Anapa saka kwona heechikiitawak. Anapa kwotak yakiita. ¹⁹ Ameda siinak, diita nosapek tawa ma mima yepa saka an kawka hekiitawak. Wowey, kwopa ana hekiita. Ada eechaba eechaba tawaga kwopa eechaba takiita. ²⁰ Eeta komas nedii ad eeji Apoko riitaka eecha tawey, kwo hekiita. Kwo eecha hekiita kwo adaka tawak, ada kwotaka eecha tawa. ²¹ Ma riieeji lon yeechi sumowutaney, eeta ma rii ana rukusiito. Rukusiitawey, iipa eeji Apoko riipa riina rukusiibatakiita. Wowak, anapa eechaba riina rukusiibatakiita. Wowak, ada geenyek ya sayanak, riipa an hehar hekiita.”

²² Anadii Judas (Iskeriot, yaho) rii Jisas riina woher: “Harapa Ma, boyewak mii notaban geenyek mukuchichawak, diita nosapek tawa ma mima yensakapa mukuchibakiitawak?” ²³ Jisas rii awasen eecha wor: “Ma rii ana rukusiitaney, riipa eeji majin sumowutakiita. Wonyak, eeji Apoko riipa eeta ma riina rukusiitakiita. Wonyak, sipa riitaka yanak, eechaba eechaba riitaka takiita. ²⁴ Eeta ma rii ana rukusiinan biish tawey, riita eeji majin sumowukasakech. Diita majin kwota meeji tari, ii eeji majikasakech. Ana heechirek yar Apoko riiti maji.

²⁵ “Ada kwotaka eecha tarek, diita boboyen ada kwona sawotar. ²⁶ Eeta kiyatay tawa nareboyen, eeta Holi Spiriten, eeji hik eeta Apoko

riipa heechinak yakiita. Eeta Holi Spirit riipa yanak, riipa kwona eyey boboyen pokiitanak, ada kwona mashi sawor eyey majin riipa yaya kwoti masekiibak heechikiita.

²⁷ “Ada heechi ik otiinak, eshar kwoya ta boboyen kwotana heechi ikiita. Eeji eshar kwoyaba ta boboyen kwona heechi ikiita. Diita nosapek tawa ma mima yecha eshar kwoya tawa boboyen kwona hatawaga an eeche hakasakech. Opoche kwi inyaka negarabochi akiitanakech.

²⁸ Ada kwona heechi ichi awasen kawka kwotak yakiita ii kwo meejir. Kwota ana rukusiiteyega, ada eeji Apoko iken otiitawey, kwo waga eena meejichi kwoya hikitu. Apoko rii eeta harapa. An dagiir poyetu. ²⁹ Dii saka yatawak, ada kwona wocho. Ii yanak, napa kwo eena hiki siitiichi.

³⁰ “Anapa kwotaka nokwapa maji kawka bakasakech. Diita nosapen aka tabo yichawa ma rii yato. Riiti hapaga tawa boboy sii ya ana siitii kowukasakech. ³¹ Wowak, diita nosapek tawa ma ye sa hiki ada Apokon rukusiito. Eena Apoko riita ana batawa eyey majin ada eena otiito. Na sokwanak, hawa ik.”

15

JISAS RII EECHA WOCHO: “ADAKA NA EECHA CHISHI TA”

¹ “Ada eeta me nawaba. Eeji Apoko rii nowo yo otii tawa ma. ² Eeji me tapa omu wanan siiney, ii Apoko rii tiimii raboto. Eyey, me tapa omu wataway, Apoko rii eena hechi tiimii poy tawak rii hehar tawak, omu hehar wato. ³ Ada kwona sawotar maji sii eeta kwona tiimii poy hamar.

⁴ Kwota na adabaka eeche ta. Tanak, kwotaka eeche takiita. Me tapa nawabak tanan siiney, iipa boyega siik watakiita? Eechaba tawa kwota adaka tanan siiney, kwo omu wakasakech.

⁵ “Ada eeta me nawaba kwo eeta me tapa. Eeta ma ye adaka tanak, an yechaka taney, yepa harapa siiken watakiita. Kwota ana heechi iney, kwopa omu wakasakech. ⁶ Ma por rii adaka tanan siiney, riin me tapaga tiimiichi rabonak, riipa reekiisiikiita. Wonyak, eeta me tapa yen ye i yopo yichi hik tukutu.

⁷ “Kwota adaka eeche taney, eeji maji sii kwotaka eeche taney, kwo yaken hikina eeyey boboyen wohenyey, iipa kwo yakiita. ⁸ Wowak, kwo siik harapa watanak, kwo eeji disaipel si-inak, eeta nobok eeji Apoko ri hi eetapa harapa siikiita. ⁹ Apoko rii ana rukusii tawaga, ada kwona eechaba rukusiito. Eena na ada rukusii tawa boboyek na ta. ¹⁰ Kwota eeji lon hehar sumowu taney, ii kwopa eeji rukusii tawa boboyek eeka siikiita. Ada eeji Apoko riiti majin sumowu tari, ada riiti rukusii tawa boboyek eeka tawaga, kwopa eeji rukusii tawaboboyek eechaba siikiita. ¹¹ Diita majin ada kwona ba hamar. Eena ada kwoya hiki tawa boboysa kwoti sugu wopuk ta. Tanak, kwoti sugu wopuk takiikiisiichi tanak, na kwoya hiki ta.

¹² “Dii eeta eeji lo eeche tawa: Ada kwona rukiisii tawaga kwo na eechaba kwoti yaka kumwoyenrukusiiba ta. ¹³ Ma por rii riiti nareboyen kiyatayeken maban mayama heechiney, akar rukusii tawa boboy sii diina dagiir poyechi kepi

siikasakech. ¹⁴ Kwota eeji majin eecha sumowu taney, kwo eeta eeji apoma tawa.

¹⁵ “Yo otii wakasa ma ye yechi harapa ma riita otii tawa boboyen hekasakech. Eena ada kwona yo otii wakasa ma habakasakech. Yaho. Eyey majin ada eeji Apoko riitak yarin, ada kwona sawo hamar. Eena ada kwona nareboy wocho.

¹⁶ “Kwota ana hisiikasakech. Yaho. Ada kwona hisii: Kwota inyak harapa siiken waken eena hisii: Eecha otiiri, siik eechaba eechaba takiita. Eecha otiiri, kwota eeji hik Apoko riina yaken otiina boboyen wohenyey, ii riipa hakiita. ¹⁷ Dii eeta eeji lo maji: anadii man na rukusii ta.

NOSAPEK TAWA MA YEPA DISAIPEL YENYA OW ANA PIKIITA

¹⁸ “Diita nosapek tawa ma yecha kwona yuy-ataney, kwo na hiki mapo ye ana yuyeechi ow ana pir. ¹⁹ Kwota diita nosapek tawa ma taney, diita nosapek tawa ma yepa kwona rukusiitakiita. Wowak, kwo diita nosapek tarin, ada kwona hisiirek, kwo diita nosapek yechikasakech. Eena diita nosapek tawa ma ye yuyato. ²⁰ Ada kwona bar majin opoche abosuchitanakech. Na hiki ta, yo otii wakasa ma ye yechi harapa man dagiir poyekasakech. Yecha ana kikir poyeri, yepa kwona eechaba kikir poyekiita. Ye eeji majin sumowuyega, ii ye waga kwoti majin sumowubawa. ²¹ Wowey, ye ana heechirek yar Apoko riina hekasakech. Eena kwo eeji yo otii ma taweyn yepa kapasek otiikiita.

²² “Ada ya yenya maji banan siiyega, ye waga kapasek boboy takasakech. Wowey, apa ye kapasek boboy veenyi nobokasakech. ²³ Nokwapa

nokwapa yon anadii ma ye eeji Apoko riina yuyabato. ²⁴ Nokwapa nokwapa yon anadii ma ye eena otiikasakech. Ada ya yechi nediik eeka otii mukuchir. Ada eeta yon yechi nediik ya otiinan siiyega ye waga kapasek boboykasakech. Wowey, apa ye he hamarek, eena ye ana eeji Apoko riitaka sinya yuyato. ²⁵ Wowak, yechi lo maji sii eecha wocho: ‘Yecha ana biish sobo yuyato.’

²⁶ “Komas kwona kiyatayek tawa ma, Spirit siiken, rii Apoko riitaka taweyn, ada i heechinak, rii ya ana maji kwona batakiita. ²⁷ Kwo na eechaba sawoba ta. Mashi kwo adaka tarek, ada tasiir yo sii i i diita apa nedii. Eena na sawo ye i ta.

16

¹ “Kwota ana hiki siitiichichawa boboyen abo-suchinakech eena ada kwona diita majin wocho. ² Komas ye kwona otu akak otii poyechinyak geenyik ya sayakiita. Komas nedii yanak, kwona pi sowakwo hamakiita. Wonyak, eecha hiki takiita ye God ri yon kiyatay tawa ma. ³ Wowey, ye Apoko riina saka hechawak, ana saka heb akiitawak eena eecha otiikiita. ⁴ Wowey, ada kwona diita boboyen ba hamar. Komas diita boboy sokwanak, kwo napa ada mashi sawo tarin hiki ta.”

HOLI SPIRIT RIITI YO

⁵ “Mashi ada kwotaka eecha tarek, ada eena kwona sawokasakech. ⁶ Wowak, apa ada ana heechirek yar Apoko riitak ichu. Wowak, kwoti nediik tawa ma por rii ada i eemen ana

wohekasakech. ⁷ Yaho. Ada diita majin kwona batawey, kwi bii kapo nomoyato. Ada kwona maji siikenen wocho. Ada heechi inyey, eeta boboy sii kwona kiyatay boboy. Ada inyan siiney kwona kiyatay boboy rii yakasakech. Wowak, ada heechi inyey, anapa riina wochinak, ya kwona kiyatayi takiita. ⁸ Kommas riita ya otiichinyak, diita nosapek tawa ma yepa kapasek boboy siiti mun hekiita. Yepa nagwa nagwa kepi otii tawa boboy siiti mun hebakiita. Yepa anasa tawa boboy siiti mun hebakiita. ⁹ Yecha ana hiki siitiichinyan biish tawey, ii eeta ye kapasek boboyeka eecha tawa. ¹⁰ Ada eeta Apoko riitak awasen inyak, kwo kawka ana saka hekiitawak, ii yepa nagwa nagwa otii tawa boboy siiti mun hekiita. ¹¹ Diita nosapek aka tabo yichawa ma riin anaseechi otii poyerek, eena yepa anasatawa boboyen hekiita.

¹² “Ada nokwapa nokwapa majin kwona wok, wonyey, kwopa kapo saka hehar eyey meeji hamakiitawak. ¹³ Kommas omutiik tawa Spirit riipa ya kwona siiken tawa boboyen mukuchitakiita. Yanak, riipa saka riiti inyagak saniga otiitakiitawak. Yaho. Riita meeji majin iiban sawotakiita. Riipa kwona kommas yak tawa boboyen eena sawotakiita. ¹⁴ Riipa eeji majiba yeechi kwona sawotakiita. Eecha otiitanak, riipa eeka eeji hin yesokwatakiita. ¹⁵ Eyey Apoko riiti boboy eeta eejiyiba. Eena ada eecha wocho eeta Spirit rii eeji maji yeechi kwona sawotakiita.

KWO MAPO NOMUYATAWA BOBOYEN ABO-SUCHI KWOYA HIKITAKIITA

¹⁶ “Ameda nedii siinak, kwopa an sak kawka hekiitawak. Kommas ameda nedii siichi kwopa ana kawka hekiita.” ¹⁷ Riiti disaipel kaw ye eecha batar: “Ii boy maji mun rii nona wocho? Rii eecha wochi, ‘Ameda nedii siinak, kwopa an saka kawka hekiitawak. Kommas nedii siichi kwopa ana kawka hekiita! Rii kawka eecha wocho, ‘An Apoko riitak iku!’” ¹⁸ Ye eecha woher, “Diita ameda nedii riita wowey, rii boyen wowa? No riita bawa maji mun meejikasakech!”

¹⁹ Jisas rii hikir yecha woheken otiir majin. Eena rii yenya eecha wor: “Kwoboy ada kwona bar maji mun eena wopoy paka hecho? Ada kowna wowa: ‘Ameda nedii siinak, kwopa an hekasakech. Kommas ameda siinak, kwopa na kawka hekiita.’” ²⁰ Ada kwona maji siikenen wocho: Kwopa keya keyaniga inyakapwa hkitakiita. Wonyak, diita nosapek tawa ma mima yepa kwoya hiki ye itanak, kwoti bii apa nomuyatakiita. Wonyak, bii nomuyatawa boboy siipa dareboyenak, kwopa kwoyawoy hikitakiita. ²¹ Mima yikapwan yimowuk otiwa nedii sii yawak, sii inyakapwa hikitu. Sii hecho kapa meeji tawa nedii sii yato. Eena inyakapwa hikitu. Wowak, yikapwan yimowu hamanak, sii kapa meeji-tar boboyen abosuchitakiita. Yikapwa yimowu hamarek diita nosapek tawak eena sii abosuchi kwoya hikitu. ²² Kwo eechaba tawa. Apa kwi bii nomuyato. Wowak, anapa way kwon kawka henyak kwopa kwoya woy hikitakiita. Kwoti kwoya hiki tawa boboyen nasowoyekasakech.

²³ “Eeta nedii yanak, kwopa ana boy boboyen wohekasakech. Ada kwona maji siikenen

bato: Kwo Apoko riita kwona boboyen haken wohenyey, riipa eeji hik kwona hakiita. ²⁴ Mashi kwo eeji hik boboyen yaken wohekaskech. Apa na wo hecha. Wonyak, kwopa yatakiita. Eena kwi sugu wopu kwoya woy hikitu.”

JISAS RII DIITA NOSAPEK OTII TAWA ABON RII DAGIIR POY HAMAR

²⁵ “Ada kwona diita boboy wochari, ada shi tawa majik wochar. Ada komas kwona shiyi tawa majik bakasakech. Eeta nediik ada kwona geenyik Apoko riina kwodii wo mukuchikiita. ²⁶⁻²⁷ Eeta nediik kwopa eeji hik God riina maji batakiita. Ada eecha bakasakech ‘Ada Apoko riina kwona kiyatayeken wohekasakech.’ Yaho. Apoko riita kwona rukusiito. Kwo ana rukusi-itawey, kwo ana God riita heechirek, yarek eena hiki siitiichichawak, eena God riita kwona rukusiito. ²⁸ Mashi ada Apokoka taren heechi diita nosapek yar. Apa ada diita nosapen heechi Apokok ichu.”

²⁹ Worek, riiti disaipel ye meeji eecha wor: “Apa mii geenyik kwodii wocho. Mii shiyi majik bakasakech. ³⁰ Apa no hecho namey ma miina awasen wohekasakech. Mii eyey boboyen hecho. Eena nota miina hiki siitiichichu. Mii God riitaka eecha taren yar.”

³¹ Jisas rii awasen eecha wor: “Apa kwo boy hiki siitiichichu? ³² Eeta nedii yato. Ayo, eeta apa yawa. Yepa kwona kikirichinyak, kwopa heechi kwoti akamak saniga saniga i ye yanak, adaba saniga diika takiita. Wowak, ada saniga takasakech. Apoko rii adaka eecha tawa. ³³ Ada

hikitu kwoti inyaka sa adaka tanak kwo na kwoya hiki ta. Eena ada diita majin kwona wocho. Kwo diita nosapek tawey, nomuyato. Wowak, kwoti inyaka sa hapaga siichi ta. Ada diita nosapek tawa boboyen dagiir poy hamar.”

17

JISAS RII DISAIPEL YENYA KIYATAYEKEN EENA GOD RIINA MAJI BATAR

¹ Jisas rii diita majin ba hamarek, rii neren now hechi eecha wor: “Apoko, diita nedii sii yawa. Mii napa miiti Yikapwa riiti hinna yesokwa ta.

² Wonyak, Yikapwa riipa miiti hin yesokwaba takiita. Miita Jisas Kraist riina eyey man siitii kowu hapaga boboyen hakiita. ³ Eechaba eechaba tak tawa boboy diitata: ma ye sa he mii, omutiik tawa God, Jisas Kraist, miita heechirek yar Yikapwa, riina sa heba ta.

⁴ “Ada miiti hadabas boboyen yaya nosapek tawa man mukuchir. Ada miita ana har yo otii hamar. ⁵ Apoko! Apa miitaka tawa hadabas boboyen na ana ha. Mashi adaka eecha tar boboyen nosap sokwanan biish tar nediik tar boboyen eena na ana ha.

⁶ “Diita nosapek tawa ma kawen miita ana hari, yenya ada miina mukuchi hamar. Yecha miiti tawa. Tawak, yenya miita ana har. Yecha miiti majin mayishichi sumowutar. ⁷ Apa yecha hecho eyey miita ana har boboyen, miita ana har. ⁸ Miita ana har majin ada yenya har. Worek, yecha yar. Yecha hecho ada miitaka taren heechi

yar. Yecha hiki siitiichichu miita ana heechirek, an yar.

⁹ “Miita yenya kiyatayeken ada miina maji bato. Ada diita nosapek tawa ma yenya maji bachikasakech. Yahoo. Miita ana har ma yechaban ada bachichu. Eeta miitiyiba eena ada bachichu. ¹⁰ Eeji boboy eyey eeta miitiyiba. Miiti eyey boboy eeta eejiyiba. Wowak ye eeji hin yesokwato.

¹¹ “Ada heechi kawka miitak yak otiito. Ada diita nosapek takasakech. Yechaba diika takiita. Holi Apoko yenya na hehar siitii kowu ta. Yepa miiti hik eeka sapa ta. Miita ana har hibak sapa ta. Wonyak, ye sapa podatebakta. Shicha podatebak tawaga, sapa eecha ta. ¹² Ada yechada tar nedii an yenya hehar ta. Ye miiti hik tarek, ye kepi tar. Eeta hi miita ana har hi. Ada yenya hehar otiitarek, por kapasek siikasakech. Ma podar riitaba wurubu yarebo tawa. Mashii keyir maji sii eecha wor riipa wurubu yarebokiita. Mashii heyir maji sii sokwa siiken taken eena rii eecha tar. ¹³ Apa ada miitak yato. Yechi sugu wopu sa takiikiisiinak kwoya woy hiki ta eena diita nosapek kwona wocho.

¹⁴ “Ada miiti maji yenya ha hamar. Ada diita nosap ma yechikasakech. Yecha eechar diita nosap yechikasakech. Eena diita nosap ma ye yenya yuyato. ¹⁵ Miita yenya diita nosap tawan yeechi ye iken ada eena miina wohekasakech. Yahoo. Ada miina wohechawey, miita yenya hehar tanak, Gaba rii yenya yeechi wadey siikasakech. ¹⁶ Ada diita nosapeksasakech. Ye eechar diita nosapekasakech. ¹⁷ Miiti maji eeta maji siiken.

Miita eeta majik na yenya otiichinyak, ye sa holi ma kepiga sii. ¹⁸ Miita ana heechirek, diita nosapek yarega ada yenya eechaba heechirek, diita nosapek ir. ¹⁹ Yecha kepi siiken eena eeji maban miina hato. Ada gegiyato yecha sokwaniga miiti ma siiken eena ada miina hato.

²⁰ “Ada miina maji batawey, yechabansaniga bachikasakech. Yaho. Batawey, eeta ma yecha yechi majin meeji ana hiki siitiichikeneena bato. ²¹ Yecha podarebak hiki takeneena ada miina wohecho. Apoko, miita adaka tawak, ada miitaka tawaga yecha eecha takeneena ada wohecho. ²² Eeta hadabas boboyen miita ana hari, ada yenya ha hamar. Miita sicha podebak tawaga yecha sa eechaba podatebak ta. ²³ Miita adaka tawak, ada yechaka tawak, yepa sokwa podatebak siikiita. Eecha otiitaney, diita nosap tawa ma yepa eecha hikiita miita ana heechirek yar. Yecha keena eecha hikikiita miita ana rukusiitawaga, miita yenya eechaba rukusiibato.

²⁴ “Apoko, ada hikitu miita ana har ma yecha ada tawa eemebak taken an hikitu. Eecha tanak, miita ana har boboyen, hadabas boboyen, ye sapa heba ta. Diita nosap saka otii tar nediik miita ana rukusiitar boboyen har. ²⁵ Yo omutiikeban otii tawa Apoko, diita nosapek tawa ma ye miina saka hechawak. Wowak, ada miina hecho. Diita nosapek tawa ma ye miina saka hechawak. Wowak, ada miina hecho. Diita ma ye eecha hecho miita ana heechirek, an diika yar. ²⁶ Ada miiti hin yenya geenyik kwodii wo mukuchirek, ada kawka eechaba otiikiita. Miita ana rukusii tawa boboyen yechaka eecha siiken, ada yechaka

eecha taken, eena ada eeche otiito.”

18

OW ANA PICHAWA MA YE JISAS RIINA YAR

¹ Jisas rii God riina maji bar hamarek, worek, rii riiti disaipel yechaka i Kidron pa reekiichi akar yepak ir. Ye hapaka tar eem sii eeka tarek, eena Jisas rii riiti disaipel yechaka eeka i yarer. ² Judas, Jisas riina anadii ma tapak how haken otiitar ma, rii eeta eemen hebar. Eechaba eechaba nedii Jisas rii riiti disaipel yechaka eeta eemek yaya yichar. Eena hebar. ³ Eena, Judas rii, gavman yechi ow ana pichawa ma yechaka eeta eemek ir. Perisi ye opelen otiitar ma ye yechi ow ana pichawa ma yenya heechirek iri, Judas riitaka eeche ibar. Yecha iri, habata ow ana pichawa boboyeka eeche neekii neekii ir. ⁴ Worek, Jisas rii her eyey boboy riitak yak otiiri, worek, rii sokwa i bana bana siitiichi yenya woher: “Kwo naman yeshato?” ⁵ Worek, ye awasen eeche wor: “No Nasaret Jisas ya yeshato.” Worek, rii awasen yenya eeche wor: “Ada diitata.” Judas, Jisas riina mukuchir ma, rii yechaka eeche siitiibatar.

⁶ Jisas rii eeche worek, “Ada diitata,” ye meejiichi sen sen iri, nosapek sakar. ⁷ Worek, Jisas rii yenya kawka woher, “Kwo naman yeshato?” Worek, ye eeche wor: “Nasaret Jisas.”

⁸ Worek, Jisas rii awasen eeche wor: “Ada kwona wo hamawa, ada diitat. Kwo ana yeshataney, diita ma yenya na heechinak, sapa i.” ⁹ Kapo boyewak diita majin rii wor? Mashi rii God riina eeche wor: “Diita miita ana har ma yen ada por heechinak sakakasakech.” Diita maji

siita siiken wey sokwaken eena rii eecha wor.
¹⁰ Worek, Saimon Pita eekika eecha tari, rii eekin
 heyi huguruk yeechi rii opelen otiitar harapa
 ma riiti yo otiitar sakasa ma poren riiti mabiya
 mama yepan tiimii rabor. Eeta wakasa ma riiti hi,
 Malkas. ¹¹ Worek, Jisas rii Pita riina wor: “Miiti
 eekin na saragak awasen heyi heechi. Ii boy ana
 Apoko riita har kapa meeji tawa heebiyana anapa
 saka boy uku akiitawak?”

YE JISAS RIINA YEECHI ANAS RIITAK YE IR

¹² Worek, gavman ow ana pichawa ma
 yechaka, yechi harapa ma riitak, Ju ma yechi
 ow ana pichawa ma yechaka ye Jisas riina yeechi
 pokok jir. ¹³ Jirek, ye Anas riitak ye ir. Anas
 riiti mima siiti apoko eeta Kaiapas. Kaiapas
 rii eeta sukwiya harapa opelen oti hechar ma.
¹⁴ Kaiapas rii mashi Ju ma yenya eecha wor:
 “Sabor ma podareba hanak, eyey ma miman
 kiyatayechi hacho.”

*PITA RII EECHA WOR: “AN JISAS RIINA
 HEKASAKECH”*

¹⁵ Saimon Pita rii akar disaipel por riitaka piir
 Jisas riina sumowutar. Opelenotiitar harapa ma
 rii eeta akar disaipel poren hechar. Eena rii
 opelen otiitar ma riiti inyik iyarebar. ¹⁶ Wowak,
 Pita rii sabak nuburejaka bana bana siitiitar.
 Akar disaipel riin oplen otiitar harapa ma rii
 hechari rii nuberejan siitii kowutar mima siina
 worek, rii Pita riin i yayarer. ¹⁷ Nuberejan siitii
 kowutar mima sii Pita riina woher: “Mii kapo
 diita ma riiti disaipelebar.”

Worek, Pita rii awasen eecha wor: “Yaho. Adakasakech.” ¹⁸ Yo otiitar ma ye siitii kowutar ma yechaka hin tukuchi maba neekiir yarek eena he waretar. Worek, Pita rii i yechaka eecha siitiichi hi warebatar.

OPELEN OTIITAR HARAPA MA RII JISAS RIINA WOHER

¹⁹ Eeta opelen otiitar harapa ma rii Jisas riina woher riita pokiitar majin disaipel yechi majin eena woher. ²⁰ Worek, Jisas rii awasen eecha wor: “Ada majin eyey ma mima yechimiso-mak geenyek kwodii wochar. Eechaba eechaba nedii ad lotu akak yenya sawotarek, tebel akak sawotar. Ju ma yecha ya yopo wuchi yichar eemek eeka an sawotar. An boy majin veenyi eemek pochi bakasakech. ²¹ Boyewak mii ana wochecho? Na eeta majin mmejitar ma yenya wohe. Ada batar maji ye meejitar.”

²² Rii eecha wocharek, kubu neeki ma por rii bana siitiitari rii Jisas riina pichi eecha wor: “Mii boyewak harapa ma riina eecha wocho?”

²³ Worek, Jisas rii awasen eecha wor: “Ada kapasek majin bataney, ii na eeta kapasek maji siin geenyek kwodii wo. Ada maji kepin bataney, boyewak mii ana piwa?”

²⁴ Worek, Jisas riin jir poko eechaba tarek, Anas rii riin heechirek, Kaiapas riitak ir.

PITA RII KAWKA WOR: ADA JISAS RIINA HEKASAKECH

²⁵ Worek, Saimon Pita rii siitii hi watarek, ye riina eecha wor: “Mii kapo riiti disaipeleba?” Rii veenyechi eecha wor: “Yaho. Adakasakech.”

²⁶ Worek, opelen otiitar harapa ma riiti yo otiitar wakasa ma por, Pita riita mabiyan tiimiir ma riiti magapa, rii eecha wor: “Ada miina kapo yichar eemek hebar?” ²⁷ Worek, Pita rii awasen eecha wor: “Yaho.” Worek, apochoko aya wor.

YE JISAS RIINA YEECHI PAILAT RIITAK YE IR

²⁸ Worek, ye Jisas riina yeechi Kaiapas riina heechi harapa gavman ma riiti akak ye ir. Eeta niyega hubuk. Yecha eeta harapa gavman ma riiti akan iyarekasakech. Ye eecha hikir, “Nota otiiniga kehanak, nopa kapo Pasova nokusha akasakech. Eena ye iyarekasakech. ²⁹ Worek, eena ye geenyek tarek, Pailat rii ya saya yenia woher: “Kwo diita ma riin boyewak anasaken otiito?” ³⁰ Worek, ye awasen eecha wor: “Diita ma riita kapasek boboyen otiinan biish teyega, no waga saka miitak yayawak.”

³¹ Worek, Pailat rii yenia eecha wor: “Na keena kwota otii tawa aboga eecha otiiniga anasa.”

Worek, eeta Ju ma ye riina eecha wor: “Nota man por pi sowakwo nobokasakech.” ³² Mashi nedii Jisas rii ha majin wori eeta maji sii eeta sokwa siiken majik siir.

³³ Eena Paiat rii heechi gavman harapa ma riiti akak tawka iyarer. Worek, rii Jisas riina uwa yayeechi woher: “Mii boy kapo Juda yechi aka tabo yima.”

³⁴ Jisas rii awasen eecha wor: “Kapo miita saniga eeta majin hikichi ana wocho? Kapo akar mak miina ana eecha wor?”

³⁵ Pailat riiawasen eecha wor: “Mii boy eecha hikitu an boy Ju ma? Miiti ma ye opelen otiitawa

harapa ma yechaka kwo adak yayawa. Mii boyen otiir?” ³⁶ Worek, Jisas rii awasen eecha wor: “Eeji yo otii wakasa ma ye waga ow ana piwa. Wowak, namey ma ana Juda yechi tapak how hakasakech. Wowey, eeji kigdom diita nosapek takasakech.”

³⁷ Worek, eena Pailat rii eecha wor: “Wowak, mii aka tabo yima por? Jisas rii awasen eecha wor: “Miita keena eecha wocho, an aka tabo yima. Eeji awi sii ana yimowurek ada diita nosapek yar. Boyewak an yar? Ada boboy podaten otiiken eena yar. Maji siikeneban sawotaken eena ada yar. Eyey ma kaw ye maji siikeneka eecha tawey, ye ana meejito.” ³⁸ Worek, Pailat rii awasen woher: “Maji siiken ii boy boboy?”

PAILAT RII JISAS RIINA MEK JI SIITIICHIKEN WOR

Worek, rii eecha bachi rii kawka Juda yechaka iyarer. Iyarechi rii eecha wor: “Ada riiti kapsek boboyen pochi hekasakech. ³⁹ Wowey, kwoti Pasova otii tawa abo ada ma poren pokon heemachichawak, ichu. Eena kwo kapo hikitu ada Juda yechi aka tabo yiman heemachik?”

Worek, ye eena uwar: “Rii biish! Mii napa Barabas riina heemachi!” Barabas rii man pi sowakwotawak mey boboyen hikyik yato. ⁴⁰ (-)

19

¹ Worek, eena Pailat rii Jisas riina kubuk pir. ² Ow ana pichar ma ye yamika tar pokon yeechi makwoga otiichi riiti masekiik ruwuchir. Ruwuchirek, siivatabi nayen ruwuchibar. ³ Ye

yari, wohegachi woshi ar: “Sen, mii Juda yechi aka tabo yima.” Worek, ye i riina pir.

⁴ Worek, Pailat rii kawka geenyik i yarechi wor: “Na he. An riina yeechi Kwona geenyik ya sayato. Kwopa hekiita ada riiti kapasek boboyen kaw hekasakech.” ⁵ Worek, Jisas rii geenyik ya sayar. Worek, yamika tar pokon makwoga otiichi ruwuchiri, sii masekiik tarek, eecha ya sayar. Siivatabi nayen ruwuchiri sii tabatar. Worek, Pailat rii yenya wor: “Na diita ma riina he!”

⁶ Worek, opelen otiitar harapa ma ye, kubu neeki tar ma ye, riina hechi uwachi eecha wor: “Mek na ji siitiichi! Mek na ji siitiichi!”

Worek, Pailat rii eecha wor: “Kwota na keena yeechi yi i mek ji siitiichi. Ada riiti kapasek boboyen pochi hekasakech.”

⁷ Worek, eeta Juda ye riina awasen eecha wor: “Nowi lopochi tawa. Eetalo sii eecha wocho: eeta ma rii sa ha. Riita eecha wor: “Ada God riiti Yikapwa.”

⁸ Pailat rii eeta majin meejirek, rii harapa akiitar. ⁹ Worek, rii gavman ma riiti akak kawka i yarere. I yarerek, rii Jisas riina eecha wor: “Mii siitak taren yar?” Wori, Jisas rii awasen maji bakasakech. ¹⁰ Worek, Pailat rii riina wor: “Mii boyewak ana kapo bakasakech? Anapa keena kiki siinak miina heemachinyak, anapa keena miina mek ji siitiichikiita.”

¹¹ Jisas rii awasen eecha wor: “Howuk tawa God riita miina hapaga tawa boboyen hanan siiyega, mi hapaga boboy sii ana dagiir poyekasakech. Wowak, eena ma ye miiti tapak howu hari, yechi kapasek boboy eeta

harapa mayak. Miiti kapasek boboyeka kiki siikasakech.”

¹² Pailat rii eena meejirek, rii eena riina heechinak i nobon yeshar. Wori, Juda ye uwar: “Miita diita ma riina heechinak, inyey, ii miipa Sisa riiti nareboyekasakech. Rii eecha wochawey, ada eeta aka tabo yima, ii Sisa riina ow ana pichu!”

¹³ Worek, Paiat rii diita majin meejirek, rii Jisas riina geenyik yeechi ya sayar. Worek, rii anasak tawa tiikiirek eeka yichir. Ye eecha habatar papaga tar eem. Hibru maji eecha wochar, Gabata.

¹⁴ Diita nedii Pasova nokusha a nediin sayaretar. Dii eeta kiya nokun atawa nedii. Pailat rii Juda yenya wor: “Na kwoti aka tabo yima riin he!”

¹⁵ Worek, rii awasen eecha wor: “Na ye i. Mek ji siitii ji!”

Pailat rii yenya awasen eecha wor: “Kwo boy eecha hikitu, kwoti aka tabo yiman ad ye i mek ji siitiichik!” Worek, opelen otiitar harapa ma ye eecha wor: “Noti akar aka tabo yima takasakech. Sisa riitaba eeta noti aka tabo yima podar!” ¹⁶ Worek, eena Pailat rii Jisas riina mek ji siitiichiken yechi tapak how har.

YE JISAS RIINA MEK JI SIITIICHIR

¹⁷ Worek, eena ye Jisas riina yeechi riina ji siitiichi men harek, rii kiyaniga akaman heechi eem pochik ye ir. Eeta eem siiti hi, Masekii Hapa.

¹⁸ Eeta eem riina mek ji siitiichir eem. Akar ma upurus piiriin yepa yepa akar mek irek, Jisas riin nediik jir.

¹⁹ Worek, Pailat rii maji kawen keyichi eeta mebak heechir. Rii eecha keyir, “Nasaret Jisas,

Juda Yechi Aka Tabo Yima.” ²⁰ Eeta eem Jisas riina mek ji siitiichir eem harapa akama pochi eeka bana bana tar. Eena nokwapa Ju ma ye eeta keyir majin keniyitar. Pailat rii eeta majin Hibru majik keyirek, Rom majik keyirek, Grik majik keyir. ²¹ Worek, eeta Juda opelen otiitar harapa ma ye Pailat riitak i maji eecha wor: “Opoche mii eecha keyitanakech, Ju Ma Yechi Aka Tabo Yima. Mii na eecha keyi, Diita Ma Rii Eecha Wor: Ada Ju Ma Yechi Aka Tabo Yima.”

²² Worek, Pailat rii awasen eecha wor: “Ada eecha keyiri, eeta an keyi abor.”

²³ Eeta gavman ow ana pichar ma ye Jisas riina mek ji siitiichi hamarek, ye riiti siivatabin yeechi diipiira kapiira yopo yichi ow ana pichar ma ye homachi ye i yayar. Worek, ri saket yabar. Diita saketsiin kapa nobokasakech. Podareba tar.

²⁴ Eena gavman ow ana pichawa ma ye eecha wor: “No diigiikasakech. Sa eecha tanak, nota satu anemesheroke tanak, eeka sapa ma porek ya.” Yecha otiirek, mashi keyir maji sii eeta sokwa siiken siir. Keyir maji sii eecha wor:

“Ye eeji siivatabin yeechi yaya homachirek,
Eeji saket satu anamesh rokochi ma porek yar.”

Ow ana pichawa ma ye eecha otiir.

²⁵ Jisas riina jir mek riiti awi siitaka siiti kumwoy siitak, Klopas riiti mima, Maria, siitaka, Magdala Maria, siitaka ye eecha eeka siitiitar.

²⁶ Jisasrii riiti awi siina herek, riiti disaipel por rii riina rukusiitar ma riina hebar. Worek, eena rii eecha wor: “Diita ma rii eeta niji yikapwa.”

²⁷ Worek, rii eeta disaipel riina eecha wor: “Diita

mima sii eeta miiti awi.” Worek, eeta nediik disaipel rii Maria siina yeechi riiti akak ye irek, hehar otii hechatar.

JISAS RIITA HAR

²⁸ Eecha otii hamarek, Jisas rii her riiti yo eeta hamar. Keyir maji eecha wor, “Ada biiriwaga reekiisowak, ukun aken.” Rii eecha worek, eeta maji sii ya geenyik sokwar. ²⁹ Heebiya pochi eeka tari ye viniga ukun sheke atawa boboy eeta heebiya wok heechir. Worek, kubuk jichi Jisas riiti kujak heechirek, rii ar. ³⁰ Jisas rii ukun eechi eecha wor: “Eeta hamawa!” Worek, rii masekii eeta saka jeyirek, eeta kuriidiichir.

JISAS RIITI BAYAGEYN YABUK PIR

³¹ Eeta nedii Pasova sayaretar nedii. Eeta akama siitar nedii sii harapa nedii, eena eeta nediik Juda ye maba mek tanak, yuyar. Worek, ye Pailat riina wor: “No yechi yatiin reekiinak, maban yeechi ye ik. ³² Worek, gavman ow ana pi ma ye i ma upurus Jisas riitaka eecha jiri, piiriiti yatiin reekiir. ³³ Worek, ye ya Jisas riina heri, rii ha siiken harek, eena saka rii yatiin reekiirek. ³⁴ Worek, ow ana pichar ma por rii Jisas riiti bayegeyn yabuk pirek, pika ukuka eecha gwotii sakar. ³⁵ Ma por ii eena heri, rii geenyik kwodii wor. Eeta kwodii wor maji sii eeta maji siiken. Eena kwota na hiki siitiichicha. ³⁶ Mashi keyir maji eecha wor: “Ye ri yatiin reekiikasakech.” Eecha otiiri, eeta maji sii eeta ya geenyik sokwar. ³⁷ Akar mashi keyir maji sii eecha wocho: “Ma mima ye eeta pir ma riina hekiita.”

YE JISAS RIITI MABAN YEECHI YE I PAPA SUPUK SEECHIR

³⁸ Ii hamarek, Arimatia Josep rii ya Paiat riina wor: Jisas riiti maban yeechi ye i chicken. Josep rii Jisas riiti disaipel por tar. Echa tari, rii Juda yena akiirek, eena riiti hiki siitiichichar boboyen rii veenyir. Paiat rii bar majin meejichi eecha wor: “Na yeechi ye i chi.” Worek, Josep rii maban yeechi ye ir. ³⁹ Nikodimas, rii mashi Jisas riina niyik ya heri, rii Josep riitaka piir eecha ir. Josep rii kwowa ya tawa boboyeka eecha yayar. Eeta pi yechi hi, miir, alos. Eeta boboy si nomu 100 paun. ⁴⁰ Piir Jisas riiti maban yeechi siivatabik jichi Juda yecha otii tawa aboga eecha otii. Kwowa ya tawa ukuk neekichi ye ir. ⁴¹ Jisas riina mek ji siitiichir eemek nowo pochi eeka tar. Eeta nowok tiiriimo akar eeka tar. Papa supu tiiriimo eeka tar. Mashi ma por eeta tiiriimok chikasakech. ⁴² Eeta yadii nedii Juda yecha Pasova sayaretar nedii. Eeta tiiriimo supu eeka bana bana tarek, eena piir ye i eeka chir.

20

JISAS RII SANIYEECHI AWASEN YESOKWAR

¹ Sand yadii uhadiirek, niyi kaw tarek, Magdalla Maria tiiriimo supun heken ir. Irek, sii her dasiipii paretar papa tagwa seechi tar. ² Worek, sii heechi amaba i Saimon Pita riina akar disaipel, Jisas riita rukusiitari, yechaka eecha wor: “Yecha eeta Harapa riina tiiriimo supuk tarin, yeechi ye iwey, kapo siitak heechuwa?”

³ Worek, eena Pita riita akar disaipel poreka piiriita heechi tiiriimo supuk ir. ⁴ Piiriita amaba iri, akar disaipel por rii Pita riin dagiir poyechi mapo amaba i her. ⁵ Rii gamuchi mey heri, siivatabibak yicharek, her. Wowey, rii iyarekasakech. ⁶ Worek, Saimon Pita riita komas yari, rii ya nagwa nagwa tiiriimo supuk i yarer. I yearechi herei, siivatabi kawebak yichar. ⁷ Heri, siiviitabi pochi Jisas riiti maseken jiri, siin hebar. Eeta siivatabi siin saniga saniga har yichi ye ikasakech. Podatebak yopo wuchi yichitar. ⁸ Worek, akar disaipel por mapo yari, rii i yarebar. I yarebari, rii eena herek, rii hiki siitiichir. ⁹ Eeta nedii piir saka hikitarek God riiti mashi keyir maji eecha wor: Jisas riita hanak, saniyeechi kawka yesokwakiita. ¹⁰ Worek, eeta disaipel piir heechi piiriiti akak ir.

MAGDALA MARIA SII JISAS RIINA HER

¹¹ Maria sii tiiriimo supuk bana bana siitii keyitarek, sii gamuchi won mey her. ¹² Sii heri, ejel upurus piir siivatabi apaman ruwuchi yicharek sii her. Piir Jisas riiti maban seechir eemek por masekiik yicharek, por yatii hugushak yichar. ¹³ Piiriita hechi Maria siina eecha wor: “Na boyewak keyato?”

Worek, sii awasen piiriina eecha wor: “Ye eeji Harapa riina yeechi kapo siitak ye i heechuwa?” ¹⁴ Sii eecha wochi diiriiboyeri, sii Jisas riin her, siitatarek. Wori, Maria sii Jisas riin hekasakech.

¹⁵ Worek, Jisas rii siin maji wor: “Mama, ni boyewak keyato? Ni naman yeshato?”

Maria sii eecha hikir dii nowon siitii kowu tawa ma. Hikichi eecha wor: “Sen, miita yeechi ye siitak seechi taney, napa ana wonyak, an yeechi kiya ik.”

¹⁶ Jisas rii Maria siina eecha wor: “Maria.”

Worek, Maria sii diiriiboyerek, Hibru majik wor: “Rabonai.” Diita maji eecha wocho: “Tisa.”

¹⁷ Jisas rii siina eecha wor: “Opoche ana neeki heechanakech. An saka howuk i yowu tawak. Ada saka eeji Apoko riin ichawak. Wowak, nija napa i eeji yaka kumwoy yenya sawo: ‘Ada i yowunak, eeji Apoko riita, kwoti Apoko riitak riina hekiita. Eeji God kwoti God riina i hekiita.’ ”

¹⁸ Worek, Magdaa Maria sii ir. Irek, sii disaipe yenya eecha wor: “Ada Harapa riina her.” Sii Jisas riita bar majin sii yenya sawor.

DISAIPEL YE JISAS RIINA HER

¹⁹ Disaipele ye Juda yenya akiitarek, yecha tar aka nuburejan dasiipiichi yichar. Eeta Sande nedii ya ye i tar nedii Jisas rii ya yechi nedii siitiir. Siitiichi yen eecha wor: “Kwoti sugu wopu sa hehar ta.” ²⁰ Eecha wochi rii riiti bayegeyn mukuchirek, tapan mukuchir. Eeta disaipele ye eeta Harapa riina herek, yecha kwoya woy hikitar. ²¹ Jisas rii yenya kawka wor: “Kwoti sugu wopu sa kepiba ta. Apoko riita ana heechirek yar. Eechaba ada kwona heechinak ikiita.” ²² Eecha wochi rii yenya piineechi kawka wor: “Kwo eeta Holi Spiriten yawa. ²³ Kwo anadii ma yechi kapasek boboyen kwoyava yeechiney, kwi kapasek boboy eeta biish woy sowa. Kwota anadii ma

yechi kapasek boboyen egesiichi heechi taney, yi kapasek boboy siipa yechaka eechaba takiita.”

TOMAS RII JISAS RIINA HER

²⁴ Eeta nedii Jisas rii yari, disaipel ye 12 por yechaka takasakech. Riiti hi Tomas. Ri akar hi pochi Didimas. ²⁵ Worek, akar disaipel ye riina wor: “No Harapa riina her!”

Worek, Tomas rii yenya eecha wor: “Ada riiti tapan pir wowi supun eena henyan siiney, eeji tapa riina wowi pir nobon neeki henyan siiney, eeji tapa riiti bayegeyn neeki henyan siiney, ii ada hiki siitiichikasakech. Eeta sii siiken!”

²⁶ Komas 8 de siirek, Jisas riiti disaipel ye kawka i yarerek, Tomas iibak taba tar. Ye eyey nubureja dasiipii hamarek, worek, Jisas rii ya yechi nediiik siitiir. Siitiirek, rii eecha wor: “Kwoti sugu wopu sa hehar ta.” ²⁷ Worek, rii Tomas riina wor: “Miiti tapaman na diika yaya. Na eeji tapan he. Miiti tapan na yaya eeji bayegeyn na neeki he. Opoche hiki siitiichichawa boboyen nasowoyetanakech. Yaho. Mii na hiki siitiichi.”

²⁸ Worek, Tomas rii awasen eecha wor: “Mii eeji Harapa! Mii eeji God!”

²⁹ Worek, Jisas rii awasen riina eecha wor: “Mii ana hewey, mii boy hiki siitiichichu? Eeta ma ye ana henyan siiri, ana hiki siitiichichaney, ya sa kwoya hiki ta.”

JON RIITA KEYIR JE SIITI MU

³⁰ Jisas rii nokwapa nokwapa akar mirakelen disaipel yechi misomak otiitar. Otiitari, ada eena eyey, diita jeyek keyakasakech. ³¹ Wowey, dii an keyi hamar. An keyiri, kwota Jisas riina hiki

siitiichiken rii eeta Kraist, God riiti Yikapwa, eena ada keyir. Kwo hiki siitiichichaney, kwopa riiti hik eechaba eechaba siikiita.

21

7 DISAIPEL JISAS RIINA HER

¹ Komas nediik Jisas rii kawka disaipel yechi misomak Taibirias pak eeka her. Diita nobok yechak eecha yar: ² Saimon Pita, Tomas (ri hi pochi, Didimas), Nataniel (riiti eem Galili Kena), Sebedi riiti yikapwa upurus piir, Jisas riiti akar disaipel upurus piir yecha eecha eeka tar. ³ Worek, Saimon Pita rii yenya eecha wor: “An emiyep chik iku.” Worek, ye riina eecha wor: “Nota miitak ibak.” Worek, ye iri, i jabiirek yowur. Wori, eeta niyi ye emiyepen por yakasakech.

⁴ Uhadiirek, ya sokwak otiitarek, Jisas rii pagi-irebak siitiitar. Worek, eeta disaipel ye Jisas riina hekasakech. ⁵ Worek, Jisas rii yenya woher, “Yikapwa kwo boy emiyep kaw yawa?” Meejichi awasen eecha wor: “Yaho.” ⁶ Worek, rii yenya eecha wor: “Kwota na mayan yeechi mama yepa gayek rabo. Rabonak, kwopa emiyep eeka yakiita.” Worek, ye eena meejichi maya rabor. Wori, ye emiyep nokwpa nokwapa yar. Maya ye yesokwakasakech. Emiyep takiikiisiir.

⁷ Eeta disaipel por riin Jisas riita rukusiitari, rii Pita riina wor: “Rii eeta Harapa!” Saimon Pita rii riiti saketen kwoyaveechi yo otiitari, rii meejiri, “Rii eeta Harapa”, rii eena sakaten yeechi ruwuchi pak duriir. ⁸ Worek, eeta anadii disaipel ye yari, ye eeta emiyepen mayaka eecha kiyi ye

yo wur. Ye pagiirebak yapak takasakech. 300 pit eecha tar.

⁹ Ye ya gayechi heri, hi uwutarek, emiyep hik uwutarek, gey iibak tar. ¹⁰ Jisas rii eecha wor: “Kwota yawa emiyepen kaw na yeechi yaya.”

¹¹ Worek, Saimon Pita rii meejiichi jaborek yowur. I Yowuchi mayan kiyi yaya giirebak yichir. Nokwapa nokwapa harapa emiyep eeta maya takiikiisiir. 153 emiyep eecha tar. Eecha nokwapa nokwapa harapa tari, maya sii neekiikasakech.

¹² Jisas rii yenya eecha wor: “Na ya a.” Eecha wori, disaipel por eena eecha wohekasakech: “Mii nama?” Ye eyey her rii eeta Harapa. ¹³ Jisas rii yari, geyen yenya homachi hapoy pakar. Emiyepen eechaba otiir.

¹⁴ Jisas rii tiirimok heechi ya sokwarek, rii mayama disaipel yenya piiriichar nedii mukuchir.

JISAS RII PITA RIITAKA MAJI BAR

¹⁵ Ye a hamarek Jisas rii Saimon Pita riina maji bar: “Saimon, Jon riiti yikapwa, mii boy kapo diita disaipel kaw yen dagiir poyechi mii ana rukusiito?” Pita rii awasen eecha wor: “Ayo, Harapa Ma, mii hecho, ada miina rukusiito.” Worek, Jisas rii riina eecha wor: “Miita napa eeji sipsip yin hava ta.”

¹⁶ Kawka rii way wor: “Saimon, Jon riiti yikapwa, mii boy ana rukusiito? Kapo saka rukusiitawak?” Worek, Pita rii riina wor: “Ayo, Harapa Ma, mii ana hecho, ada miina rukusiito.” Jisas rii awasen riina wor: “Miita napa eeji sipsipen siitii kowu ta.”

¹⁷ Piiriichar nedii rii way kawka wor: “Saimon, Jon riiti yikapwa, mii boy kapo ana rukusiito?” Worek, Pita riiti bii nomuyar. Piiriichar nedii wohererek, “Mii boy ana rukusiito?” Worek, rii Jisas riina wor: “Harapa Ma, mii eyey boboyen hecho. Mii hecho, ada miina rukusiit.” Worek, Jisas rii riina wor: “Mii napa eeji sipsip yenya hava ta.”

¹⁸ “Eeta siiken woy, ada miina wocho, mashi miita hadiiyey tarek, mii miiti putu sapin giiriichi miita iken otiitar eemek iken otiitari, mii ichar. Wowey, komas miita apoko saba siinak, eeta nedii miipa miiti tapan yesokwanak, akar mak miin putu sapin giiriichi ye ikiita. Miita inyan yuyatana eemek ye ikiita.” ¹⁹ (Jisas rii diita majin wochawey rii eecha wocho Pita riipa hanak, riipa God riiti hin yesokwakiita.) Worek, Jisas rii Pita riina eecha wor: “Ana na sumowu ta.”

JISAS RII DISAIPEL POREN MAJIN BAR

²⁰ Worek, Pita rii vayoko hechi akar Jisas ri disaipelen her. Diita her disaipel riin Jisas rii rukusiir. Disaipe yecha aboboy atarek, diita disaipel rii Jisas riitaka bana bana kwarkwar i Jisas riitaka anahayichi eecha woher: “Harapa, nama notaka tawey, apa miina kapasek otiikiita?” ²¹ Pita rii riina hechi Jisas riina woher: “Harapa, ii boy diita ma riita?” ²² Jisas rii awasen eecha wor: “Ada gegiyaney, riipa saka hatanak anapa yakiitawak. Iipa miiti yokasakech. Ana na sumowu ta.” ²³ Jisas rii diita majin eecha worek, eena Jisas riina sumowu tar ma ye eecha hikir diita disaipel rii saka hakiitawak. Eena maji i

ye yatar. Wowak, Jisas rii saka worek, rii saka hakiitawak. Yaho. Rii eeche wor: “Adagegiyaney, riipasaka hatanak, anapa yakiitawak. Iipa miiti yokasakech.”

²⁴ Diita disaipel riitaba rii diita maji bachiniga riitaba keyir. Wowak, no hikitu riiti maji eeta omutiik.

²⁵ Wowak, nokwapa nokwapa akar boboy Jisas rii otiir. Eyey riita otiir boboy podat podaten keyiney, an eeche hikitu diita nosap sakapa kiki siikiitawak keyir jey takiikiisiikiita.

GOD RITI MAJI KEPI
The New Testament in the Washkuk Language, also
known as the Kwoma Language, of Papua New Guinea
Nupela Testamen long tokples Washkuk long Niugini
copyright © 1974 Wycliffe Bible Translators, Inc.

Language: Washkuk (Kwoma)

Dialect: Kwoma or Washkuk

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

PDF generated using Haiola and XeLaTeX on 21 Feb 2024 from source files dated 31 Aug 2023

df8dc48f-feff-515c-a5a2-c9c957dac5bb